

**TI COLTAELE TEX  
HOY TA AC'OL**



## TI COLTAELE TEX HOY TA AC'OL

Ti coltaele tex hoy ta ac'ol, ja' jun bun ti laj yi'ch tzobilanel jujuntic yi laj yi'ch- tael ta bibliae ja' yu'un laj yi'ch t'ujel ti s'cop lie. Jch'unojtic ti lequil a'yej lie loctalel ta jun ch'ul bun ti ja' ta biblia stuque.

Li scop Diose “liquem tael ta toyol” y ja' lequil coltael y poxtael yu'un ti ho'ntonale, Ti xc'olaj binal y taquitil ta xai ti c'usitic lec ta xil ti cajavaltique. C'alal mi hoy junuc buch'u ta sutes ti yo'ntone, ta xicta comel ti mulile, ta xic ochtalel ti Jesucristo, ta naclej ta yut yo'nton, y ta ch'un ta sjunul Yo'nton ti ja' jcoltabanej ti cajvalticque, ti cajvaltique ta xac sba ta ilel ta stojol. Ta xacbe tal muyubajele xch'iuc ti jun o'ntonal ti bu'chu ta xch'une. Taje c'ot ta pasel taj tojol 1937, ja'y u'un un toj ep xi muyubaj no'ox tajmec ch'iuc ti cajvaltique. Cha calbot a ba'i ta ora ja'lec a'yio y ch'uno ti cajvaltique, Ac'o ochuc ta bonton y ta cuxlej al.

—Watson Goodman (1920-2002)

## LI C'UXUN YO'TON LI DIOSE

Pero li Diose laj yac' ta ilel ti ta melel sc'anojutique, ac'o me solel yuxub jpasmulilutic, pero icham ta jcojtic li Cristoe.  
—Romanos 5:8

Li Diose laj yac' quiltic ti ep sc'anojutique, yu'un la stac tal li' ta banamil li jun no'ox Xnich'one, yu'un jech xu' ta jtatic jcuxlejaltic ta sventa.  
—1 Juan 4:9

Mu'yuc boch'o jech toj ep c'anel yu'un, mu'yuc boch'o xu' ta xac' sba ta milel ta scoj li boch'o lec sc'opan sba xchi'uque.  
—Juan 15:13

Xchi'uc ta sventa li Jesucristoe, ja' li tuq'uil testigoe, ja' ti ba'yuc icha'cuxi loq'uel ta smuquinale, ja li banquialal yu'un scotol ajvaliletic li' ta banamile, ti ep c'uxutic ta yo'ntone, ti la smanutic ta xch'ich'al ta sventa jmultique.  
—Apocalipsis 1:5

Vo'one ono'ox laj cac' jba ta ilel ta stojolic, jech laj calbe: Laj cal ti j'ech'el la jc'anot oe, ja' yu'un yoquel to jech jc'anojot o.  
—Jeremías 31:3

“Yu'un toj ep la xc'uxubin scotol cristianoetic ta banamil li Diose, jech laj yac' li jun no'ox Xnich'on oye, yu'un jech mu ch'ayeluc chbat li boch'otic ta xch'unic ti ja' Jcoltavanej yu'unique; ja' ta xcuxiic o sbatel osil.”

—Juan 3:16



## LI JESUCRISTOE JA' DIOS

<sup>1</sup>Ta sliquebal banamile, te ono'ox oy o li C'ope. Li C'ope te xchi'inoj sbaic xchi'uc li Diose. Ja' ono'ox Dios stuc.

<sup>14</sup>Li C'ope la spas sba ta cristiano. La xchi'inuncutic ta naclej. Laj quilbecutic slequilal yutsilal, ja' slequilal yutsilal li jun no'ox Xnich'on Diose. —Juan 1:1 y 14

Yu'un jbel sc'oplal toj yan to sba smuc'ul li c'usi melez la jch'untique: Ja' li sc'oplal li Boch'o laj yac' sba ta ilel ta jtojoltic xchi'uc sbec'tale, ivinaj ta sventa Ch'ul Espiritu ti tuc' yo'ntone; i'ilat yu'un j'almantaletic. Ipucbat batel sc'oplal ta yantic banamil; laj yich' ch'unel li' ta banamil, xchi'uc laj yich' iq'uel muyel ta lequilal. —1 Timoteo 3:16

<sup>22</sup>Scotol ti jech ic'ot ta pasele yu'un ja' ic'ot o c'usi laj yal Cajvaltic ti c'alal la xch'amanbe ye yaj'alc'op ta vo'onee. Jech laj yal: <sup>23</sup>“A'yo ava'yic, ta xlic xchi'in yol jun tojol tseb, ta svoq'ues jun quem; Emanuel ta xac'be sbi”, xi ono'ox. “Dios li' jchi'uctic”, xi smelol li sbie.

—Mateo 1:22, 23

Li vu'une jununcutic xchi'uc li Jtote – xi li Jesuse.

—Juan 10:30

<sup>9</sup>Li Jesuse jech laj yalbe: –Ep xa c'ac'al li' jchi'inojoxuc. ¿Me mu to xavotquinun, Felipe? Li boch'otic laj xa yilicune laj xa yilic o li Jtote. ¿C'u yu'un chavalbun: 'Ac'bun cotquincutic li Jtotic Diose', xachi? <sup>10</sup>¿Me mu xach'un ti vu'un jun oyuncutic jchi'uc li Jtote? Li c'usi ta xcalboxuc ava'yique mu jc'opuc jtuc. Ja' sc'op li Jtot ti li' jchi'uque. Ja' stuc tspas li abteletic ta jpase. —Juan 14:9, 10

## LI JESUCRISTOE JA' XNICH'ON DIOS

Itac'ov li j'almantale: –Ja' ta xtal ta atojol li Ch'ul Espiritue. Ta sventa stsatsal Dios ta vinajel ta xlic achi'in li avole. Li olol ta xvoc' avu'une ja' Xch'ulnich'on Dios ta xc'ot sbi. —Lucas 1:35



Yu'un ivoc' jun quem ta jtojoltic; lij'ac'bat jun nich'onil. Ja' ac'bil tsots yabtel sventa tspas mantal; ja' jech sbi ch-ac'bat: Ech'em Yutsil, Jbijubtasvanej, Tsatsal Dios, Totil Sbatel Osil, J'ac'-Jun-O'ntonal, xi sbi chc'ot.

—Isaías 9:6

C'alal ja'o chlo'ilaj li Pedroe, ital jvol toc, oy xjobal; te macbil ic'otic. Te laj ya'yic c'op ta yut toc, jech laj yal: “Li'i ja' jnich'on, lec jc'anoj. Lec jpatoj co'nton yu'un. A'ibeic sc'op”, xi. —Mateo 17:5

<sup>36</sup>Itac'ov li vinique: – ¿Albun ca'ay boch'o? [Xch'ulnich'on Dios] yu'un jech xu' ta jch'un –xut. <sup>37</sup>Li Jesuse jech laj yalbe: –Li' xa aq'uelojbe sate, yu'un ja' li boch'o li' ta sc'opanote –xut. —Juan 9:36-37

Yu'un li Cristoe yich'ojbe scotol c'u x'elan stalel li Diose. —Colosenses 2:9

Li boch'o ta xal ta jamal ti ja' Xnich'on Dios li Jesuse, te oy Dios ta yo'nton, jech ec li stuque te oy ta stojol li Diose. —1 Juan 4:15

Pero li boch'o t'ujbil yu'un Dios, xchi'uc ti tacbil tal yu'un Dios li' ta banamile ¿c'u yu'un chavalic ti tstoy sba ta stojol Dios c'alal chal ti ja' Xnich'on Diose?

—Juan 10:36

## CHI XYALBUCUTIC MUCH' O TI JESUCRISTOE

<sup>23</sup>Li Jesuse jech laj yalbe: –Li vo'oxuque ta peq'uel oyoxuc; yan li vu'une ta toyol liquemun tal. Li vo'oxuque li' liquemoxuc ta banamil; yan li vu'une muc li'uc liquemun ta banamil. <sup>58</sup>Itac'ov li Jesuse: –Jamal chacalboxuc ava'yic, c'alal mu'yuc to'ox li Abrahame, te ono'ox oyun li vu'une –xi. —Juan 8:23, 58

<sup>25</sup>Li antse jech laj yal: –Jna'oj ti ta xtal li boch'o t'ujbil yu'un Diose, ja' li Cristoe. C'alal ta xtale, ta xac'butic jna'tic scotol c'usi tsc'an Dios –xi. <sup>26</sup>Itac'ov li Jesuse: –Vu'un ti li' ta jc'opanote –xut. —Juan 4:25-26

Itac'ov li Jesuse: –Vu'un li vaj c'otemun sventa chacuxiic oe. Li boch'o ta xtalic ta jtojole, mu'yuc xa ta xa'yic o vi'nal. Li boch'otic ta xch'unicune mu'yuc xa ta xtaquij o yo'ntonic. —Juan 6:35

C'alal li' to oyun ta banamile, vu'un luz c'otemun li' ta banamil –xi. —Juan 9:5

Li Jesuse jech laj yal noxtoc: –Jamal chacalboxuc ava'yic, vu'un li sti' scoralil chij c'otemune. —Juan 10:7

Li vo'oxuque, 'Jchanubtasvanej, Cajval', xavutican. Lec ti jech chavalbicune, yu'un vu'un ta melez. —Juan 13:13

Li Jesuse jech laj yalbe: –Vu'un jcha'cuxesvanejun, xchi'uc vu'un j'ac'cuxlejalun. Li boch'o ta xch'un ti vu'un Jcoltavanejune, ac'o me ta xcham, pero ta xcuxiic sbatel osil. —Juan 11:25

Li Jesuse jech laj yal: –Vu'un li beune, vu'un li melez, vu'un li cuxlejalune. Mu'yuc boch'o xu' chbat ta stojol Jtot ti me mu xtal ta jtojole. —Juan 14:6

## LAJ YAC TA ILEL SBUELTAC TI JESUCRISTO LAS PAS

<sup>19</sup>Li Jesuse laj yalbe mantal cristianoetic ti ac'o chotiicuc ta c'unil jobeltique. Li Jesuse la stsac li vo'ob pane xchi'uc li cha'cot choye. La sq'uel muyel vinajel, la stojbe ta vocol Dios. La svoc' li pane xchi'uc li choye. Laj yac'be li yajchanc'optaque. Ja' xa la spucbeic ec li cristianoetique. <sup>20</sup>Ive'ic scotolic, lec inoj xch'utic o. La stsobbeic li scomelaltaque, la staic lajchab moch. <sup>21</sup>Ti c'u yepal ive'ique, oy van vo'miluc viniquetic. Ja' slecoj li antsetique xchi'uc li ololetique. —Mateo 14:19-21

<sup>4</sup>C'alal laj yo'nton ta chanubtasvaneje, li Jesuse jech laj yalbe li Simone: —Lechuo batel yo' bu natil nab li acanovae. Ja' te xatiq'uic ochel li anuti'ique, yu'un ja' te chataic ep choy —xut. <sup>5</sup>Itac'ov li Simone: —Jchanubtasvanej, sbejel ac'ubal laj cac'cutic persa sa'el li choye, pero mu'yuc la jtacutic. Ta sventa ti vo'ot chaval mantale, jech ta jtac'cutic ochel yan velta li jnuti'cutique —xut. <sup>6</sup>C'alal la stic' ochel snuti'ique, bats'i ep la staic li choye; lic tuch'anuc li snuti'ique. —Lucas 5:4-6

<sup>30</sup>Te chotolic ta ti'be la staic chib ma'satetic. C'alal laj ya'yic ti te ta xjelov li Jesuse, tsots laj yaptaic: —Cajval, vo'ot smomnich'onot David, c'uxubinuncutic —xiic. <sup>32</sup>—¿C'usi chac'an ta jpasboxuc? —xut. <sup>33</sup>Itac'ovic: —Cajval, yu'un ta jc'an ac'o jamuc jsatcutic —xiic. <sup>34</sup>Li Jesuse ic'uxubaj ta yo'nton. La spicbe li satique, jech ta ora ijam; la xchi'inic batel li Jesuse. —Mateo 20:30, 32b-34

## LI JESUCRISTOE JA' JPASBANEJ Y JA'MUC'UL AJVALIL

Ti epal jabil muc xac' ta na'el li Dios ti la spas scotol c'usitic oye. —Efesios 3:9b

Ja' ta sventa i'ayin scotol li c'usitic oy ta vinajele, li c'usitic oy ta banamile, xchi'uc li c'usitic xquil ta jsatique, xchi'uc li c'usitic mu xquil ta jsatique, ti tsots tspasic mantale, ti ch'unbil smantatique, ja' li banquilaletique, ti tsots svu'elique. Scotol le'e ja' laj yich'ic pasel yu'un li Cristoe, xchi'uc ja' sventa ac'o ich'atuc ta muc'. —Colosenses 1:16

Ja' ta sventa laj yich' pasel scotol li c'usitic oye. Ti manchuc oy li C'ope, me jchopuc mu'yuc c'usi pasbil tana ti jechuque. —Juan 1:3

Li Diose...Yan li' ta ora ti slajebtic xa batel c'ac'ale, ta sventa xa Xnich'on la sc'opanutic li Diose, ja' li xnich'on ti laj yac'be sventain scotol c'usitic oye, xchi'uc ti ja' ta sventa la spas scotole. —Hebreos 1:1a, 2

Scotol cristiano ta jujuchop c'op chlic yalic ta jamal ti ja' Ajvalil stuc li Jesucristoe; jech ich'bil ta muc' chc'ot li Dios Totile. —Filipenses 2:11

“Ja' yu'un acotolic ta sjunul slumal Israel, tsc'an chana'ic ta melec: li Jesús ti laj amilic ta cruze Dios laj yac' c'otuc ta Cajvaltic xchi'uc ta Jcoltavanej”, xi li Pedroe. —Hechos 2:36

Ja' yu'un ti icham li Cristoe xchi'uc ti icha'cuxie, yu'un jech ja' Yajval chc'ot scotol, ac'o me chamenic xa, o me cuxulutic to. —Romanos 14:9

Li Dios ti laj yic'oxuc ta stojole mu sna' sjel sc'op. Laj yic'oxuc sventa jun chac'ot achi'uquic li Xnich'one, ja' li Cajvaltic Jesucristoe. —1 Corintios 1:9



# LI JESUCRISTOE JA' JCHAPANBANEJ C'UUN JCOTOLTIC

Ja' yu'un li vo'ote, ¿c'u yu'un chasa'be smul li achi'ile? Jech ec li vo'ote, ¿c'u yu'un chabaj li achi'ile? Yu'un ta jujuntal chc'ot jva'an jbatic ta stojol Cristo yo' bu ta xchapanvane.  
—Romanos 14:10

Ta xcalbot mantal ta stojol Dios xchi'uc ta stojol li Jesucristoe, ja' li boch'o ta to xtal ta Ajvalilal sventa chtal xchapan li boch'otic cuxajtique xchi'uc li boch'otic chamenique.  
—2 Timoteo 4:1

<sup>31</sup>Jech laj yal noxtoc li Jesuse: “C'alal chital jchi'uc jxojobal, vu'un ti Xnich'on cristiano lic'ote, ta jchi'in tal scotol li ch'ul j'almantaletique; ja'o chlic chotlicun ta jchotleb ti jun yutsil slequile. <sup>32</sup>Ta stsob sbaic tal ta jtojol scotol li cristianoetic ta sbejel banamile. Ta xlic jvoc'an jech chac c'u cha'al jchabichij ti slecoj ta xac' li xchije xchi'uc li stentsune.”  
—Mateo 25:31, 32

“Yu'un li Jtote muc ja'uc ta xchapan stuc li cristianoetique. Vu'un yac'ojbun jventain xchapanel, vu'un li Xnich'onune.” —Juan 5:22

Pero c'alal tsta yorail yu'un Dios ta xchapan scotol cristianoetic ta sventa li Jesucristoe, scotol ta xac' ta ilel, ac'o me ta mucul pasbil, yu'un ja' jech chal li Lequil A'yej ta jchole.  
—Romanos 2:16



Laj yalbuncutic comel mantal ti ac'o jcholbecutic scotol cristianoetic ti ac'o calcutic ta jamal ti ja' l'ac'bat yabtel yu'un Dios sventa chc'ot ta Jchapanvanej yu'un li boch'otic cuxajtique xchi'uc li boch'otic chamenic xae.  
—Hechos 10:42

## JA'NOOX JESUCRISTOE XU'TA XPOJBAN

Vu'un li ti'coralune; scotol li boch'otic ta x'ochic ta jtojole ja' chcolic. Jech xloc' x'ochic no'ox ta scoralic, jech tsta lec sve'elic. —Juan 10:9

Li Jesuse jech laj yal: —Vu'un li beune, vu'un li melelune, vu'un li cuxlejalune. Mu'yuc boch'o xu' chbat ta stojol Jtot ti me mu xtal ta jtojole. —Juan 14:6

Ja' yu'un laj calboxuc ti te acuchoj amul chachamique, yu'un mu xach'unic ti Vu'une, jech te acuchoj o amul chachamic —xi li Jesuse. —Juan 8:24

Ta sventa ti ts'acal ivu' yu'un scotole, jech ja' ic'ot ta yajval xcuxlejalic sventa sbatel osil scotol li boch'otic ta xch'unique. —Hebreos 5:9

<sup>23</sup>Yu'un scotol cristiano jpsmuliletic, bats'i nom oy ta stojolic slequilal li Diose. <sup>24</sup>Pero ta sventa ti toj lec yo'nton li Diose, jech ta matanal ti mu'yuc xa jmultic chijyilutic ta sventa ti la stojbutic jmultic li Jesucristoe.

—Romanos 3:23-24

Jech xu' yu'un lec ts'acal tscolta sbatel osil li boch'otic chnopajic batel ta stojol Dios ta sventae, yu'un cuxul o sbatel osil, jech te chc'opoj o cu'untic ta stojol li Diose. —Hebreos 7:25

---

Yu'un mu'yuc bu yan xu' ta jtatic coltael; mu'yuc boch'o yan albil sc'oplal yu'un Dios li' ta banamil ti xu' chijcolutic yu'une —xi li Pedroe. —Hechos 4:12

---

Yu'un ma'uc laj yic'utic Dios sventa ac'o bat jtoj jmultic. Laj yic'utic yu'un ac'o colcutic sbatel osil ta sventa li Cajvaltalic Jesucristoe. —1 Tesalonicenses 5:9

## JA'NOOX JESUCRISTOE CHIS SPOJOTIC

Yu'un li vo'oxuque ja' ta sventa Dios ti oyoxuc xa ta stojol Cristo Jesuse. Ja' li boch'o laj yac' jna'betic c'u x'elan sbijil stuc li Diose. Ja' ti c'u x'elan tuc' co'ntontic chijyilutique, ti c'u x'elan chijlecubutic batele, xchi'uc ti c'u x'elan chijcole. —1 Corintios 1:30

Ja' ti laj yac' sba ta milel ta jcojtic, yu'un jech la spojotic loq'uel ta sventa c'usitic chopole, xchi'uc ti la slecubtasutic sventa chijyu'uninutique, xchi'uc ti jutebuc co'ntontic ac'o jpastic c'usi leque. —Tito 2:14

<sup>12</sup>Jech xcuxet no'ox avo'nton chatojbeic ta vocol Jtotic Dios ti laj yac' avu'uninic ec li c'usi sc'oplal chich'ic li yu'untac Dios ti oyic xa ta sac osile. <sup>13</sup>Yu'un ja' la sloq'uesutic tal ta sc'ob li yajval ic' osile; laj yac'utic ta sc'ob li Xnich'on ti lec sc'anoje, yu'un ja' ac'o sventainutic. <sup>14</sup>Ja' li Xnich'on ti la smanutic ta xch'ich'ale, ti ja' ta sventa la jtatic perdón yu'un jmultique. —Colosenses 1:12-14

Vu'un ti Xnich'on cristiano lic'ote ja' tal jcolta, ja' tal jsa' li boch'otic ch'ayemique —xi li Jesuse. —Lucas 19:10

C'ano abaic jech chac c'u cha'al la sc'anutic li Cristoe, yu'un laj yac' sba ta milel ta jcojtic. Ja' smoton Dios ic'ot, ja' milbil matanal ti oy lec smuil laj ya'ay li Diose. —Efesios 5:2

La sq'uejintaic jun ach' q'ueoj, jech chal: "Vo'ot no'ox atuc puru lec c'usi apasoj ti ivu' avu'un laj avich' li vune, xchi'uc xu' avu'un chatuch'be li spaq'ue. Yu'un vo'ot laj avich' milel. Ta ach'ich'al laj aman sventa chc'otic ta yu'untac Dios li cristianoetic ta jujuchop sts'unubal, ta jujuchop c'op, ta jujun lum, xchi'uc ta jujun banamile", xi li sq'ueojique. —Apocalipsis 5:9

# LI XCH'ICH'EL LI CRISTIOE JA'TAS SLOQ'UES LI MULILE

<sup>9</sup>Ja' yu'un c'u to x'elan lec chijyilutic ta sventa xch'ich'al li Cristoe, yu'un ja' ta sventa ti mu'yuc xa chbat jtoj jmultique. <sup>11</sup>...xcuxet co'ntontic ti colemutic xae, toj jun no'ox co'ntontic ta stojol Dios noxtoc ta sventa li Cajvaltuc Jesucristoe, yu'un ja' ta sventa ti lec xa jc'opan jba jchi'uctic li Diose. —Romanos 5:9 y 5:11b

Ja' li Xnich'on ti la smanutic ta xch'ich'al, yu'un jech la jtatic o perdón yu'un li jmultique, yu'un bats'i ep c'uxutic ta yo'nton. —Efesios 1:7

Li'i ja' jch'ich'al sventa chc'ot ta pasel li c'usi chapanbil ono'oxe. Yu'un ta xmal ta sventa ep cristianoetic, jech ep boch'o tsta perdón yu'un smulic. —Mateo 26:28

<sup>18</sup>Yu'un xana'ic ti smanojoxuc xa loq'uel ta sventa li achopol talelic ti mu'yuc stue, ti ja' la xchanubtasoxuc comel li amoltot ayame'ic ta vo'onee. Xana'ic ti mu ja'uc la stojoxuc o li c'usi sna' xlaje. Muc ta c'anal taq'uinuc, muc ta saquil taq'uinuc la stojoxuc. <sup>19</sup>Ja' la smanoxuc o ta xch'ul ch'ich'al li Jesucristoe, yu'un ja' laj yich' milel ta jcojtic jech chac c'u cha'al ch'ium chij laj yich' milel, ti toj leque, ti mu'yuc bu chopole. —1 Pedro 1:18, 19

Yan me chixanovutic ta sac osil jech chac c'u cha'al oy ta sac osil stuque, ta meel jun chijc'ot ta jcotoltic; chispocbutic loq'uel scotol jmultic ta xch'ich'al Xnich'on, ja' li Jesuse. —1 Juan 1:7

Buuc xa li xch'ich'al Cristoe, j'ech'el la spocbutic o loq'uel ta jol ta co'ntontic li c'usi mu'yuc stu la jpastique, yu'un jech ja' xa chlic tuncutic yu'un li cuxul Diose. Yu'un li stuque mu'yuc smul ta stojol li Diose. Stuc laj yac' sba ta smoton Dios ta jventatic sventa sbatel osil ta sventa li Ch'ul Espiritue. —Hebreos 9:14

## LI XCHÚNLALEJ CO'ONTATIC TA CRISTOE TAJ TATIC COLTAEL

<sup>8</sup>Yu'un ta yutsil no'ox yo'nton ti colemoxuc xa ta sventa xch'unojel avo'ntonique. Muc ta aventauc atuquic ti laj ataic coltaele, ja' amotonic no'ox yu'un li Diose. <sup>9</sup>Muc ta sventauc cabtelic, yu'un jech mu'yuc boch'o xu' tstoy sba. —Efesios 2:8, 9

Ja' yu'un li' ta orae, tuc' xa co'ntonic lijc'ot ta sventa xch'unojel co'ntonic. Jech ico'laj co'ntonic xchi'uc Dios ta sventa li Cajvaltuc Jesucristoe. —Romanos 5:1

Yu'un ta stojol Cristoe, ma'uc tsots sc'oplal me quich'octic circuncisión, me muc quich'octicuc circuncisión. Ja' tsots sc'oplal li xch'unojel co'ntontique, yu'un jech xu' cu'un chijc'anvanutic. —Gálatas 5:6

—Ch'uno li Cajvaltuc Jesuse, jech chacol..., xchi'uc...ta sjunul ana —xutic. —Hechos 16:31b

Yu'un scotol li boch'o ja' xa xnich'nabtaque ttsal yu'unic li c'usi sventa banamile. Li xch'unojel co'ntontique ja' chac' vu'uc cu'untic stsalel li c'usitic sventa banamile. —1 Juan 5:4

<sup>28</sup>Jech la sjac'beic li Jesuse: —¿C'usi ta jpascutic sventa chi'abtejcutic ta yabtel Dios ec li vu'uncutique? —xiic.

<sup>29</sup>Itac'ov li Jesuse: —Li yabtel Dios tsc'an chapasique, ja' ti ac'o ach'unic li boch'o tacbil tal yu'une —xut.

—Juan 6:28, 29

---

Ti c'u yepal laj yich' ts'ibael li'i, ja' sventa ac'o ach'unic ti ja' Cristo li Jesuse, ti ja' Xnich'on Diose. Yu'un me chach'unique, chacuxiic o sbatel osil ta sventa.

—Juan 20:31

---

## LI SC'UXUL YO'ONTON LI DIOSE

Ac'o ich'atuc ta muc' li Diose, ja' li Stot Cajvaltic Jesucristoe, ja' li Totil ti ep chc'uxubinvane, ja' li Dios ti chispatbutic co'ntontique. —2 Corintios 1:3

Mu'yuc yan Dios jech chac c'u cha'al vo'ot, it chapasbe perdón, ti chach'aybe ta avo'nton smulic li scomelal ateclumale. Muc teuc no'ox stsoq'uet o avo'nton ta stojol, yu'un ja' oy ta avo'nton li c'uxubinvaneje. —Miqueas 7:18

Yu'un toj muc' li c'uxubinel avu'une, xjelov to smuc'ul jech chac c'u cha'al li vinajele; staoj c'alal to vinajel li c'usi melez chavale. —Salmos 108:4

<sup>22</sup>Li c'uxubinel yu'un Muc'ul Diose mu'yuc slajeb; mu sna' xlej o li slequil yo'ntone. <sup>23</sup>Ta jujun sob ta ach'um yan velta; solez mu sna' xjel o li yo'ntone.

—Lamentaciones 3:22, 23

<sup>11</sup>Yu'un mu'yuc spajebal chc'uxubin li boch'otic chich'ic ta muq'ue, jech chac c'u cha'al mu'yuc spajebal yilol sbaic li vinajel xchi'uc banamile. <sup>17</sup>Pero li c'uxubinel yu'un Muc'ul Diose sbatel osil mu'yuc spajebal o ta stojol li boch'otic chich'ic ta muq'ue. Li slequil stuq'uil yo'ntone te chcom o ta jayc'oluc alab nich'nabetic.

—Salmos 103:11, 17

---

Jech la scoltautic. Pero mu ja'uc ta sventa tuc' c'usi la jpastic ti jech la scoltautique; ja' ta sventa xc'uxul yo'nton stuc. Ja' ta sventa ti la spocutic, ti la sjelbutic co'ntontic, ti laj yac' cha'voc'cutic ta ach' ta sventa li Ch'ul Espiritue. —Tito 3:5

---

## LI DIOSE TA XIC'OTICTAL TA STOJOL

Jech chayalboxuc li Muc'ul Diose: “La'ic ta jtojol ta ora, la' caltic c'usi tsc'an pasel. Ac'o me bats'i cuxul tsoj li amulique, sac chcom jech chac c'u cha'al tayo; ac'o me ic'ic'tic xa sba stsajal, sac chcom jech chac c'u cha'al saquil tsots.”  
—Isaías 1:18

Li Ch'ul Espiritu xchi'uc li yajnil Ch'ium Chije jech chalic: “La' me ta ora”, xiic. Li boch'otic cha'yic li c'op li' ts'ibabile jech ac'o yalic ec: “La' me ta ora”, ac'o xiicuc. Li boch'otic taquin yo'ntonique ac'o talicuc ta stojol li Jesuse. Li boch'o tsc'ane smoton ch-ac'bat li vo' sventa cuxlejale.  
—Apocalipsis 22:17

“Acotolic, vo'oxuc ti taquin avo'ntonique, la' uch'anic li vo'e; vo'oxuc ti mu'yuc ataquinique, la' ve'anic ta matanal; la' uch'anic ya'lel ts'usub xchi'uc ya'lel xchu' vacax, mu'yuc chatojic.”  
—Isaías 55:1

Ta slajeb c'op, ta mero sc'ac'alil q'uin lic va'luc li Jesuse, tsots ic'opoj, jech laj yal: —Li boch'o oy taqui-o'nal cha'ye, ac'o taluc ta jtojol; ac'o tal yuch' li vo' ta xcaq'ue.  
—Juan 7:37

C'alal laj yil Jesús ti ta spajesvanic li yajchanc'optaque, chopol laj ya'ay. Jech laj yalbe: —Ac'o talicuc ta jtojol li ololetique; mu me xapajesic. Yu'un li boch'otic ja' jechic jech chac c'u cha'al ololetique ja' chventainatic yu'un Dios.  
—Marcos 10:14



“La'ic ta jtojol acotolic, vo'oxuc ti lubenoxuc yu'un li tsatsal abtele xchi'uc li alal icatsile, vu'un ta xcac' acux avo'ntonic.”  
—Mateo 11:28

## MA'UC SCOTOLIC JA'XNICH'ON DIOS

Jech ta xvinaj boch'o xnich'nab Dios xchi'uc boch'o xnich'nab pucuj. Scotol li boch'o mu spasilanic c'usitic tuq'ue xchi'uc li boch'otic mu'yuc sc'anoj xchi'ile, mu ja'uc xnich'on Dios. —1 Juan 3:10

<sup>14</sup>Yu'un scotol li boch'otic ja' chtojobtasatic yu'un li Espiritu yu'un Diose, ja' xnich'nab Dios. <sup>15</sup>Yu'un ti laj avich'ic Ch'ul Espiritue ma'uc sventa chtic'van ta mozoil yu'un ac'o oyuc xi'el chava'yic yan velta jech chac c'u cha'al ta vo'onee. Laj avich'ic Espiritu sventa chac' c'otanic ta Xnich'on Dios, ja' yu'un ja' ta sventa ti "Tati" xcutic xa li Diose. —Romanos 8:14, 15

Yu'un jech mu soc ac'oplalic, xchi'uc jech mu xata amulic. Jech chvinaj ta stojol chopol cristianoetic, ch'ayemal cristianoetic ti vo'oxuc xnich'naboxuc Diose, ti mu'yuc chopoloxuque. Ja' jech xaxojobanic ta stojolic jech chac c'u cha'al luz ti xojobanic c'alal ic' osile. —Filipenses 2:15

<sup>17</sup>Jech yaloj noxtoc: "Loc'anic me ta stojolic, voc'o abaic loq'uel; mu me xapiquic li c'usi toj chopole, jech chaquic'oxuc ta jtojol. <sup>18</sup>Jech vu'un Atoticun chic'ot; vo'oxuc jquerem jtseb chac'otic o ec, xi li Cajvaltic ti ech'em svu'ele." —2 Corintios 6:17-18

---

Yan li boch'otic la sc'anic, ti laj yich'ic ta muq'ue, i'albatic ti xnich'nab Dios xa ic'otic oe. —Juan 1:12

---



## MIJ JPATOJ NO'OX C'ONTONTIC TAJ JTUTIQUE MUYUC C'USI LET TAJ TATIC

<sup>17</sup>C'alal chloc' xa'ox batel li Jesuse, ta anil ital jun vinic; la squejan sba ta stojol li Jesuse. Jech la sjac'be: -Lequil jchanubtasvanej, ¿c'usi ta jpas ti xu' chicuxi o sbatel osile? -xut. <sup>18</sup>Itac'ov li Jesuse: -¿C'u yu'un chavalbun ti lecune? Mu'yuc ono'ox boch'o lec; ja' no'ox lec stuc li Diose. <sup>19</sup>Xana' ti jech chal li mantaletique: 'Mu me xamilvan, mu me xamulivaj, mu me xa'elc'aj, mu me xanopbe smul achi'il, mu me xalo'lavan, ich'o ta muc' atot ame'', xi -xi li Jesuse. <sup>20</sup>Itac'ov li viniqu: -Jchanabtasvanej, scotol le'e biq'uitun lic jch'un tal -xi. <sup>21</sup>Li Jesuse la sq'uel li vinique; ic'uxubaj ta yo'nton, jech laj yalbe: -Pero oy to c'usi sc'an avu'un. Batan, bat chono scotol li c'usitic oy avu'une; q'uelanbo me'onetic li stojole. Jech chata ac'ulejal ta vinajel. Ja'o xtal achi'inun -xut. <sup>22</sup>C'alal laj ya'ay li vinique, ep ilo'ilaj yo'nton. Ep laj yat yo'nton ti c'alal ibate, yu'un toj ep sc'ulejal.

—Marcos 10:17-22

---

Chalic ti xotquinic Diose pero ta sventa c'usitic tspasic chvinaj ti mu meleluque. Solel bolibenic o, jbajmantaletic o; mu'yuc stuic o ta sventa li lequil abtele. —Tito 1:16

---

Oy be ti tuc' ta tamel yilele, pero ti bu chc'ote ja' sventa lajel. —Proverbios 16:25

<sup>37</sup>Itac'ov li Jesuse: -'C'ano me ta scotol avo'nton li Dios avu'une, xchi'uc ta scotol ach'ulel, xchi'uc ta scotol ajol', xi li mantale. <sup>38</sup>Ja' sba mantal ti bats'i tsots sc'oplale.

—Mateo 22:37, 38

## MUXA LO'LA ABAIC

Mu me xalo'la abaic. Yu'un li Diose mu xu' chlabanat. Li c'usi tsts'un jujun cristianoe ja' chc'ot sc'aj.

—Gálatas 6:7

<sup>7</sup>Jnich'nabtac, mu me boch'o xaslo'laoxuc. Li boch'o ja' ta spas c'usitic tuq'ue, ja' tuc' yo'nton, jech chac c'u cha'al tuc' yo'nton li Cristoe. <sup>8</sup>Yan li boch'o ta to sa'ilan smule te to oy ta sc'ob pucuj. Yu'un li pucuje ja' la sliques li mulil ta sliquebale; ja' jech yabtel o. —1 Juan 3:7, 8a

<sup>9</sup>¿Me mu xana'ic ti mu xu' ch-och yo' bu chventainvan Dios li boch'otic chopol c'usitic tspasique? Mu me xalo'la abaic. Yu'un mu xu' ch-ochic yo' bu chventainvan Dios li boch'otic chmulivajique, li boch'otic chich'ic ta muc' c'usi cuybilibic ta diose, li boch'otic ta xmulivajic ta xchi'il no'ox sbaic ta antsil xchi'uc ta xchi'il no'ox sbaic ta vinicale, <sup>10</sup>li j'eleq'uetique, li boch'otic xpich'et no'ox yo'ntonique, li jyacubeletique, li boch'otic chopol chalbeic sc'oplal xchi'ilique, xchi'uc li boch'otic tslo'labeic ta mucul c'usi oy yu'un xchi'ilique. —1 Corintios 6:9, 10

Mu me xaslo'laoxuc li boch'otic mu meeluc c'usi chalique. Yu'un li boch'otic mu xch'unic c'usitic yaloj Diose, chapal xa sc'oplal chbat stojic. —Efesios 5:6

Pasic me li c'usi chava'yic ta sc'op Diose. Mu me ja'uc no'ox chava'yilanic, yu'un jech mu ja'uc no'ox chalo'la abaic. —Santiago 1:22

Yu'un li boch'o tsnop lec xu' yu'un, pero me mu meleluque, tslo'la sba stuc. —Gálatas 6:3

Yu'un oy ep boch'o ta xalic sbiic jech chac c'u cha'al jbi vu'un. Jech ta xalic: 'Vu'un Cristoun', xiic. Jech ep boch'otic ta xlajic ta lo'lael. —Mateo 24:5

## C'USI CHAL LI DIOS TA SVENTA LI HUCHBAJELE

<sup>19</sup>Li yabtel jbec'taltique lec stac' otquinel. Ja' jech chac li'i: mulivajel, spasel c'usitic toj chopol, spasel c'usitic c'upil cha'ay jbec'taltic, <sup>20</sup>yich'el ta muc' c'usitic mu ja'uc Dios, ac'chamel, contrainvanej, liquesejc'op, ti'o'ntavanej, sbic'tal o'ntonal, tsalbail, voc'bail, sa'el c'usi lec ta ch'unel chca'itic, <sup>21</sup>xpich'etel o'ntonal, yacubel, spasel c'usiuc no'ox ta q'uinetic, xchi'uc scotol li c'usitic yan co'ol sba jech chac le'e. Ja' yu'un scotol li boch'otic jech tspasic chac le'e, chacalboxuc ava'yic jech chac c'u cha'al calojboxuc xa ono'oxe, le'e mu xu' chventainatic o yu'un li Diose. —Gálatas 5:19-21

<sup>13</sup>La' quich' lec jmelol jamtic xijxanovutic jech chac c'u cha'al li boch'o chanov ta c'ac'altique. Mu me ja'uc te xbat avo'ntonic ta epal ve'el, ta uch'bajel, xchi'uc ta yacubel. Mu me xapas c'usi c'upil cha'ay abec'talic; mu me xamulivajic. Mu me xatsaquilan abaic ta c'op; mu me xti'etuc avo'ntonic. <sup>14</sup>Ja' ac'o vinajuc stalel Cajvaltlic Jesucristo ta atojolic; mu me ja'uc oy ta avo'ntonic spasel li c'usitic tsc'an abec'talique. —Romanos 13:13, 14

Toj abul abaic vo'oxuc ti sob chaliquic batel ta yacubele, ti te ch-ic'ub o avu'unic, ja' to ti c'alal chch'ay avo'ntonic o yu'un li poxe. —Isaías 5:11

<sup>31</sup>Mu me xaslo'laot li c'usitic chac' yacubele; mu me xpich'aj avo'nton ti lec xa c'ant'ojan, ti lec xa st'islajet c'alal lechel ta bise, ti mu xa vocoluc chyal ta uch'el yilele. <sup>32</sup>Yu'un ta ts'acal ta jta ep jvocoltic yu'un, ja' jech chac c'u cha'al c'alal tsti'utic jcot jti'val chon.

—Proverbios 23:31, 32

Li poxe chac' jtoy jbatic; li c'usi tsotsic ta uch'ele chvovij joltic yu'un; li boch'o batem yo'nton yu'un poxe muc bijuc. —Proverbios 20:1

## LI MULILE JA'CHAMEBAL Y LAJEBAL

Ta jna'tic ti ta sventa jun vinic i'och li mulil li' ta banamile [Adán], xchi'uc ti ja' ta sventa mulil i'och li lajele, jech scotol cristiano chchamic, yu'un scotol cristiano jpasmulil ic'otic. —Romanos 5:12

Yu'un c'alal chcac'tic ayinuc li xpich'etel co'ntontique, ta xlic voc'uc li mulile. C'alal me laj xa xchanbe yipale, chac' lajel. —Santiago 1:15

<sup>6</sup>Li boch'o ja' batem yo'nton snopel li c'usi tsc'an sbec'tale ja' sventa lajel. Yan li boch'o ja' chbat yo'nton snopel c'usi tsc'an li Ch'ul Espiritue ja' sventa chcuxi, xchi'uc sventa tspas ta jun yo'nton. <sup>7</sup>Yu'un li boch'o ja' no'ox chbat yo'ntonic snopel c'usitic tsc'an sbec'talique, ja' tscontrainic li Diose. Yu'un mu xch'unic li smantaltac Diose, xchi'uc mu xu' yu'unic xch'unel. —Romanos 8:6, 7

“Li boch'o ta sa' smule ja' no'ox ta xcham. Li nich'onile mu xu' ta xcuchbe smul li stote, jech ec li totile mu xu' ta xcuchbe smul li xnich'one. Li boch'o tuc' c'usi tspase ja' yu'un stuc; li boch'o chopol c'usi tspase ja' yu'un stuc noxtoc.” —Ezequiel 18:20

“Li boch'o ta smilbe smoton yan diosetic, ti ja' mu xac'be smoton li Muc'ul Diose, ac'o yich' milel.” —Éxodo 22:20

Me ja' ta jpastic li c'usi tuq'ue ja' sventa cuxlejal; yan me ja' ta jpastic c'usi chopole ja' sventa lajel.

—Proverbios 11:19

Yu'un li stojol mulile ja' ti chijchamutique.

—Romanos 6:23a



“Ja' tsc'an ti jech ta jpastic q'usine xchi'uc ti xcuxet co'ntontique. Yu'un li avits'ine chamen to'ox, pero icha'cuxi xa. Ch'ayem to'ox, pero laj xa jta', xut”, xi li Jesuse. —Lucas 15:32

## LI JESUCRISTOE LAJ TZALCOMEL TI LAJEBALE

<sup>43</sup>C'alal laj yal jeche, tsots i'avan li Jesuse: –¡Lázaro, loc'an tal! –xi. <sup>44</sup>Li animae iloc' tal. Lec ts'otbil ta poc'. Li sjole pixbil ta panyo. Li Jesuse jech laj yal: –Titunic, ac'o batuc –xut.  
—Juan 11:43, 44

<sup>14</sup>Inoch'aj batel li Jesuse; la spicbe li svayabe. Li boch'otic xq'uehojic tale iva'iic. Li Jesuse jech laj yalbe li animae: –Querem, vu'un chacalbot lican –xut. <sup>15</sup>Jech ta ora ichoti li quereme; lic lo'ilajuc.  
—Lucas 7:14, 15a

<sup>17</sup>Ja' yu'un lec sc'anojun li Jtote, yu'un ta xcac' jba ta milel yu'unic li jchijtaque, yu'un jech xu' chicha'cuxi noxtoc. <sup>18</sup>Mu'yuc boch'o xu' yu'un chismilun. Slequil co'nton jtuc ta xcac' jba ta milel. Xu' cu'un ta xcac' jba ta milel. Xu' cu'un chicha'cuxi noxtoc, yu'un ja' jech smantal li Jtote –xi.  
—Juan 10:17, 18

Pero ivinaj ti ta melez ja' Xnich'on Diose, yu'un oy svu'el, yich'ojbe stalel Dios, xchi'uc icha'cuxi loq'uel ta smuquinal.  
—Romanos 1:4

<sup>25</sup>Yu'un li Cristoe ja' to tsventain o batel scotol, ja' to ti c'alal pech'bil ta teq'uel chcom yu'un scotol li yajcontrae. <sup>26</sup>Li slajeb yajcontra chulese ja' li lajele.  
—1 Corintios 15:25, 26

“Vu'un ti jtalel cuxulun oe. Licham, pero licha'cuxi; cuxulun o sbatel osil. Vu'un jventainoj scotol. Vu'un oy ta jc'ob sllavial li lajele xchi'uc li yavil animaetique.”  
—Apocalipsis 1:18

## TI SMANTALTAC TI DIOSE

<sup>7</sup>“Mu me xavich’ic ta muc’ yan diosetic; jtuc no’ox xavich’icun ta muc’, xi.

<sup>8</sup>Mu me xapas atuquic li c’usi chavich’ic ta muq’ue. Mu me xaloc’taic c’usitic oy ta vinajel xchi’uc c’usitic oy ta banamil xchi’uc ta nabetic. <sup>9</sup>Mu me xaquejan abaic ta stojol. Mu me xavich’ic ta muc’ yu’un jtuc no’ox Muc’ul Diosun avu’unic....

<sup>11</sup>Mu me xavixtanbicun jbi, vu’un li Muc’ul Diosun avu’unique. Li boch’o chiyixtanbun jbie ta xcac’be stoj.

<sup>12</sup>Na’o me li c’ac’alil chacux avo’ntonic sventa chavich’icun ta muc’ jech chac c’u cha’al calojboxuc ono’oxe. <sup>13</sup>Vaquib no’ox c’ac’al xu’ cha’abtejjic, xu’ chapasic scotol li c’usi sc’an pasel avu’unique. <sup>14</sup>Yan ta svucubal c’ac’ale ja’ sc’ac’alil chacux avo’ntonic. Ja’ voc’bil cu’un, vu’un li Muc’ul Diosune....

<sup>16</sup>Ich’o ta muc’ atos ame’ic, jech chac c’u cha’al calojboxuc ono’ox vu’un li Muc’ul Diosun avu’unique. Jech lec chabatic, xchi’uc jech jal chacuxiic te ta avosilic ti bu chacac’boxuque.

<sup>17</sup>Mu me xamilvanic.

<sup>18</sup>Mu me xamulivajic.

<sup>19</sup>Mu me xa’elc’ajic.

<sup>20</sup>Mu me xanopbe smul achi’ilic.

<sup>21</sup>Mu me xac’upinbe yajnil achi’ilic. Mu me xac’upinbe sna achi’ilic. Mu me xac’upinbe yosil, me smozo, me squiara, me xvacax, me sburo, xchi’uc c’usitic yan oy yu’un. Mu me xpich’etuc avo’ntonic yu’un’, xi li Muc’ul Diose.’ ”

—Deuteronomio 5:7-21

## MUYUC BU'CHU XU' TA SNACSBA TA STOJOL TI DIOSE

<sup>21</sup>“Yu'un li Diose yiloj scotol c'usi tspas li cristianoetique; sq'ueloj scotol li jujujet yacan chanovique. <sup>22</sup>Mu'yuc bu ta tael bats'i ic' osil ti mu xa xvinaj, ti xu' te tsnac' sbaic li boch'otic chopol c'usi tspasique.” —Job 34:21, 22

“¿Me oy boch'o xu' tsnac' sba ta snac'ubbail ti jech mu xquil bu oye? ¿Me mu teuc oyun ta scotol vinajel xchi'uc ta scotol li banamile?”, xi li Muc'ul Diose.

—Jeremías 23:24

<sup>7</sup>¿Bu xu' chibat ti jech mu xa xavilune? ¿Bu chijatov batel ti jech nom xa oyun ta atojole?



<sup>8</sup>Me chimuy batel ta yutil to vinajele, te ono'ox oyot; me chiyal batel ta yutil to banamile, te oyot noxtoc....<sup>12</sup>pero li ic' osile mu'yuc ic' chavil li vo'ote. Li ac'ubaltique lec sac chavil jech chac c'u cha'al c'ac'altic; co'ol chavil li ic'

osile xchi'uc li sac osile.

—Salmos 139:7, 8, 12

Li Muc'ul Diose chajal ta sba ta sat scotol; sq'ueloj li boch'otic lequique xchi'uc li boch'otic chopolique.

—Proverbios 15:3

Yu'un mu'yuc c'usi pasbil ti xu' nac'al chcom ta stojole. Scotol chajal ta sba ta sat stuc li Boch'o tsta yorail chc'ot calbetic c'usi la jpastique.

—Hebreos 4:13

Ja' jech mu'yuc c'usi nac'al chcom ti mu xich' vinajesele; mu'yuc c'usi mucul chcom ti mu'yuc boch'o tsna'e.

—Lucas 8:17

## TA CH'AYEL TAXBATIC SBATEL OSIL TI B'UCHU MUX XCH'UNE

<sup>41</sup>Vu'un ti Xnich'on cristiano lic'ote ta jtac tal caj'almantaltac. Ja' ta xtal stobic loq'uel yo' bu jventainoj scotol li boch'otic chaq'uic ta pasel c'usi chopole xchi'uc li boch'otic tspasic c'usitic toj chopolique. <sup>42</sup>Ta sjpic ochel ta c'oc'. Te chc'ot yoc'ta sbaic, te xc'uxet o yeic.

—Mateo 13:41, 42

Li boch'otic chopolique, ti chch'ay ta yo'ntonic Diose, j'ech'el ch-u'ninatic o yu'un li yavil animaetique.

—Salmos 9:17

Jech noxtoc li' ta orae, li vinajel xchi'uc banamile chapanbil xa sc'oplal ta xc'ac' ta c'oc' ti c'alal yorail chapanele, ja' ta sc'op noxtoc li Diose. Xchi'uc ja' yorail chbatic ta ch'ayel li chopol cristianoetique. —2 Pedro 3:7

Le'e tsts'ic svolic o ta ch'ayel sbatel osil. Nom oyic o ta stojol li Cajvaltique. Mu xilbeic o slequilal xchi'uc svu'el.

—2 Tesalonicenses 1:9

“Ja' yu'un me ta scoj no'ox ac'obic, o me avacanic chata o amulique, sebic loq'uel. Ja' lec me motmot ac'ob, o me motmot avacanic cha'ochic ta lequilale; ja' vocol me chapal avoc ac'obic chabatic ta c'oc' ti bu mu xtu'p o sbatel osile.”

—Mateo 18:8



“Jech chbat tstoij smulic o sbatel osil. Yan li boch'otic tuc' yo'ntonique ja' ta xcuxiic sbatel osil”, xi li Jesuse.

—Mateo 25:46

Li boch'otic muc xtabat sbiic ta vun sventa cuxlejale, jipatic ochel ta muc' ta c'oc'.

—Apocalipsis 20:15



## TI CHAPANEL YU'UN TI DIOSE TA XNOPAJTAL

“Yu'un li Diose sa'ojbe xa jun sc'ac'alil c'usi ora ta xich'ic chapanel scotol li cristianoetic ta banamile. Tuc' ta xchapanatic ta sventa ti c'u x'elan la spasic jujunique. Ac'bil xa ta ilel li boch'o ta xchapanvane, yu'un icha'cuxesat xa loq'uel ta smuquinal yu'un li Diose”, xi li Pabloe.  
—Hechos 17:31

Li Cajvaltique sna' c'uxi chut tscolta ta svocol li boch'o ta x'ich'at ta muc' yu'une, xchi'uc sna' bu chac' batel li boch'otic toj chopolique yu'un jech te oyic o c'alal to tsta yorail ta xich'ic chapanel.  
—2 Pedro 2:9

Yu'un jcotoltic persa chc'ot jva'an jbatic yo' bu chchapanvan li Cristoe. Yu'un jech ta jujuntal chc'ot quich'tic li stojol cabteltique, me lec, o me chopol, ja' ti c'u x'elan la jpastic xchi'uc li jbec'taltic ti sna' xlaje.  
—2 Corintios 5:10

Jech ch-epaj batel ta co'ntontic li c'anvanej yu'une. Jech mu'yuc chijxi' ti c'alal tsta sc'ac'alil chapanele; oy stsatsal co'ntonic. Yu'un c'alal li' oyutic ta banamile, ja' jech co'ntontic jech chac c'u cha'al yo'nton stuc li Jesucristoe.  
—1 Juan 4:17

Ja' jech chac c'u cha'al ti jun no'ox velta chcham scotol li cristianoetique, ts'acal to ja' xa no'ox chtal chapanel.  
—Hebreos 9:27

Laj quil te va'ajtic ta stuq'uil xchotleb Dios scotol li boch'otic chamenique. Te oyic c'alal ta muc', ta biq'uit. Jech laj yich' jamel li vunetique. Te laj yich' jamel yan vun noxtoc, ja' li vun sventa cuxlejale. Li boch'otic chamenique lic yich'ic chapanel jech chac c'u cha'al spasoic.  
—Apocalipsis 20:12a

Ja' yu'un jujunutic chc'ot caltic ta stojol Dios ti c'u x'elan la jpastique.  
—Romanos 14:12

## TI MATANAL COLTAEL YU'UN CRISTOE



Pero li jmotontic chijyac'butic Diose mu xco'laj xchi'uc li c'usi la jtatic ta sventa mulile. Yu'un ta scoj smul jun vinic ti jech chcham scotol cristianoetique. Jech buuc xa li c'uxubinel yu'un Dios ti jmotontic no'ox chijyac'butic ta sventa li jun vinic Jesucristoe, xu' tsta scotol li epal cristianoetique.

—Romanos 5:15

Li vu'utique laj xa jch'untic ti ta yutsil no'ox yo'nton Cajvaltic Jesús chijcolutique; ja' no'ox jech xu' chcolic ec li stuquique —xi li Pedroe.

—Hechos 15:11

“Li Diose chopol chil li jtoybaetique; yan li boch'o biq'uit chac' sbaique ja' chc'uxubin”, xi ts'ibabil. —1 Pedro 5:5b

Yu'un xavotquinbeic xa c'u x'elan slequil yo'nton li Cajvaltic Jesucristoe. Li stuque toj c'ulej, pero la spas sba ta me'on, yu'un jech vu'utic la yac'butic jc'ulejaltic.

—2 Corintios 8:9

<sup>20</sup>Li mantaletique ja' laj yac' vinajuc epal mulil. Pero ac'o me ep li mulile, li Diose ech'em to laj yac' ta ilel ti bats'i ep slequil yo'ntone. <sup>21</sup>Jech chac c'u cha'al laj yu'uninutic li mulil, yu'un jech ac'o chamcutic jcotoltique, ja' jech ac'o yu'uninutic noxtoc li slequil yo'nton Diose, yu'un jech ac'o cuxicutic jcotoltic ta sventa li Jesucristoe, ja' li Cajvaltique.

—Romanos 5:20, 21

Li yajtabolaltac Jesuse bats'i oy lec stsatsal svu'elic c'alal la xcholic ti ta melec icha'cuxi li Cajvaltique. Bats'i ep i'ac'bat slequil yutsil yo'nton Dios ta stojolic.

—Hechos 4:33

## TI ZUTESOBIL O'NTONALE

“Ta vo’onee muc to’ox xac’ ta venta c’u x’elan sbol talelic li cristianoetique. Pero li’ ta orae oy mantal yu’un Dios ta sventa scotol cristianoetic buyuc no’ox oyic ti ac’o sutes yo’ntonic ta stojol Diose.” —Hechos 17:30

Chacalboxuc, mu jechuc. Me mu xasutes avo’ntonic ec li vo’oxuque, ja’ jech ta xc’ot ta atojolic ec. —Lucas 13:3

Jech laj yal: “Suteso avo’ntonic, yu’un nopol xa yorail chlic ventainvanuc li Diose”, xi. —Mateo 3:2

Li Pedroe jech laj yalbe: —Suteso avo’ntonic, ich’ic vo’ ta jujunoxuc ta sbi Jesucristo, jech chaspasboxuc perdón yu’un amulic. Jech chavich’ic li amotonique, ja’ li Ch’ul Espiritue. —Hechos 2:38

Ja’ yu’un jchi’iltac, suteso avo’ntonic, sutanic tal ta stojol Dios, yu’un jech xu’ chavich’ic ch’aybel li amulique, jech chc’ot yorail ta xac’ xcuxetel avo’ntonic li Cajvaltique. —Hechos 3:19

Jipic comel scotol li achopolilic, li amulic asa’ojic ta jtojole. —Ezequiel 18:31a

Li boch’o ta smuc smule mu’yuc lec chbat; yan li boch’o jamal chal, xchi’uc me tscomtsane, ch’aybil chc’ot smul. —Proverbios 28:13

Yu’un li boch’o ch-ac’bat yat yo’nton yu’un Diose ja’ sventa tsutes yo’nton, yu’un jech chol. Yan li at-o’nton sventa no’ox banamile ja’ no’ox sventa ch’ayel.

—2 Corintios 7:10

## XU'TAJ TATIC PERDÓN YU'UN JMULTIC

“Pero me chlic scomtsan scotol smul li boch’o chopole, me ja’ chlic xch’un li mantaletic cu’une, me ja’ chlic spas li c’usitic lec, li c’usitic tuq’ue, ta jbel sc’oplal ta xcuxi; mu’yuc ta xcham”, xi li Muc’ul Diose. —Ezequiel 18:21

Vo’oxuc li jpsmuliloxuque, comtsanic li be atamojique; vo’oxuc ti ep sbolil avo’ntonique, comtsanic li c’usi chopol chanopique. Sutanic tal ta stojol li Muc’ul Diose, yu’un li stuque toj ep c’uxubinel yu’un; li Dios cu’untique toj ep perdón yu’un. —Isaías 55:7

“Yu’un me chapasbeic perdón li boch’o oy smul avu’unique, jech chaspasboxuc perdón yu’un amulic ec li Jtotic ta vinajele.” —Mateo 6:14

C’alal laj yil Jesús ti oy xch’unojel yo’ntonique, jech laj yalbe li jchamele: —Jnich’on, pasbilot xa perdón yu’un amul —xut. —Marcos 2:5

Ja’ yu’un jchi’iltac, tsc’an chana’ic ti ja’ ta sventa Jesús xu’ chijpasbat perdón yu’un jmultique. —Hechos 13:38

Pero li Diose laj xa yac’ ta ich’el ta muc’ te ta sbats’ic’ob. Laj yac’ c’otuc ta Jpsmantal, ta Jcoltavanej, yu’un jech ac’o sutes yo’ntonic ta stojol li israeletique, jech xu’ tspasbatic perdón yu’un smulic. —Hechos 5:31

“A’yo ava’yic, li vu’une li’ oyun ta ti’na chajc’opanoxuc. Li boch’o cha’ay c’alal ta jc’opane, me chisjambun li ti’nae, ta x’och jchi’in; ta jchi’in ta ve’el, jech chixchi’inun ta ve’el ec.” —Apocalipsis 3:20

Ts’ibabil noxtoc ti ja’ ta sbi ta xcholbat ya’yic cristianoetic ta scotol banamil ti ac’o sutes yo’ntonique, xchi’uc ti ja’ ba’yuc ta xcholbat li boch’otic li’ nacajtic ta Jerusalene, yu’un jech xu’ tspasbat perdón yu’un smulic.

—Lucas 24:47

## TZOTZ SCOPLAL TAJ JIPTIC COMEL TI C'USI HOY TA SBA BANOMILE

<sup>11</sup>Yu'un laj xa yac' ta ilel li slequil yo'nton Diose, ja' tal yac'be scoltaelic scotol cristianoetique. <sup>12</sup>Li slequil yo'nton Diose ja' chac' c'otuc ta co'ntontic ti ac'o jcomtsantic c'usi chopole xchi'uc li sc'upinel c'usitic sventa banamile, yu'un jech lec xa c'usitic ta jpastic batel; tuc' c'usitic chlic jpastic, xchi'uc ja' xa no'ox chquich'tic o batel ta muc' li Diose. —Tito 2:11, 12

Ja'uc me te batem asatic yu'un li c'usi sventa vinajele; mu me ja'uc xbat asatic yu'un li c'usi sventa no'ox banamile. —Colosenses 3:2

Mu me xatic' abaic ta spasbel yabtelal ec li ic' osil ti mu'yuc stue. Ja' lec ac'beic tsots taq'uiel li boch'otic jech tspasique. —Efesios 5:11

<sup>15</sup>Mu me xbat avo'ntonic yu'un li c'usi sventa banamile xchi'uc li c'usitic chopol oy ta banamile. Li boch'o ja' batem yo'nton ta sventa banamile, ja' mu'yuc sc'anoj o li Jtotic Diose. <sup>16</sup>Yu'un scotol li c'usitic oy li' ta banamile, ja' li c'usi chopol tsc'an jbec'taltique, li c'usi tsc'upin jsatique, li toybail ta sventa c'ulejalile, le'e ma'uc te liquem tal ta stojol li Jtotic Diose; ja' sventa no'ox banamil. —1 Juan 2:15, 16

¿Jmulaviloxuc ta stojol Dios! ¿Me mu xana'ic ti yajcontra Dios chijc'ot me ja' ta jc'antic c'usi sventa banamile? Li boch'o ja' lec chil sba xchi'uc li c'usitic sventa banamile, ja' yajcontra Dios chc'ot. —Santiago 4:4

“Poco abaic, atinanic lec; loq'uesic scotol li achopolilic ta jtojole; comtsanic li c'usitic chopole.” —Isaías 1:16

## SC'AN CHIJ VOC TA ACH

“Ta xcac’boxuc ach’ avo’ntonic xchi’uc ach’ atalelic. Ta jloq’uesboxuc li avo’ntonic ti xco’laj xchi’uc tone; ta xcac’boxuc lec c’un avo’ntonic.” —Ezequiel 36:26

Yu’un xana’ic xa ti tuc’ yo’nton stuc li Cristoe, jech tsc’an chana’ic noxtoc ti ja’ xnich’nab Dios scotol li boch’otic tuc’ c’usitic ta spasique. —1 Juan 2:29

Li boch’otic stotinojic xa li Diose, ta jna’tic ti mu xa teuc tsa’ilan o smulique. Yu’un li Xnich’on Diose chchabi li xnich’nabe, jech mu xpicatic yu’un li pucuje. —1 Juan 5:18

Tuc’ xa avo’ntonic chayiloxuc Dios ta sventa li Cajvaltíc Jesuse xchi’uc ta sventa li Espíritu yu’un Dios cu’untique. —1 Corintios 6:11b

Itac’ov li Jesuse: —Ta melec, jamal ta xcalbot ava’ay, li boch’o mu’yuc chcha’voc’ ta ach’e, mu xu’ chich’ ventainel yu’un Dios —xut. —Juan 3:3

Ja’ yu’un li boch’o oy xa ta stojol Cristoe ipas xa ta ach’. Ilaj xa sc’oplal li poco’e; ja’ xa ital li c’usitic ach’e.

—2 Corintios 5:17

Yu’un lacha’voq’uic ta ach’, pero mu xa ja’uc laj avich’beic sts’unubal li atot ame’ic ti sna’xlaje. Ja’ xa sventa li sc’op Dios ti cuxul, ti mu sna’xlaj oe.

—1 Pedro 1:23



<sup>11</sup>Li c’usi yaloj Diose ja’ li’i: Ja’ ti chijyac’butic cuxlejal sventa sbatel osile. Li cuxlejal sventa sbatel osile ja’ te oy ta stojol li Xnich’one. <sup>12</sup>Li boch’o xch’unoj ti ja’ Xnich’on Diose, oy xa xcuxlejal sventa sbatel osil. Yan li boch’o mu’yuc c’otem ta yo’nton li Xnich’on Diose, mu’yuc xcuxlejal sventa sbatel osil. <sup>13</sup>Vo’oxuc ti ach’unojic xa li Xnich’on Diose, la jts’ibaboxuc tal li’i, yu’un jech ac’o ana’ic ti oy xa acuxlejalic sventa sbatel osile. —1 Juan 5:11-13

## CHAMEMUN TO'OX YU'UN TI MULILE, TANA UNE LI CHA'C'UXI TA SVENTA TI CRISTOE

<sup>1</sup>Li vo'oxuque chamenoxuc to'ox ta scoj achopolilic, ta scoj amulic. <sup>6</sup>Ta sventa ti co'ol la xcha'cuxesutic xchi'uc li Cristoe, jech co'ol laj yac' chotlicutic ta vinajel noxtoc ta sventa ti quich'ojtic ta muc' li Cristoe. —Efesios 2:1, 6

Ja' stuc la xcuch ta sbec'tal li jmultic c'alal ja'o joc'ol ta cruze, yu'un jech xu' chijchamutic ta sventa li mulile; ja' chijcuxiutic ta spasel li c'usi tuq'ue. Li Cristoe ep ituch' sbec'tal, yu'un jech vo'oxuc colem lacomic.

—1 Pedro 2:24

<sup>1</sup>Ta melez co'ol xa lacha'cuxesatic xchi'uc li Cristoe, ja' yu'un tsc'an ja' no'ox chasa'lanic o li c'usi sventa vinajel te yo' bu chotol ta sbats'ic'ob Dios li Cristoe. <sup>2</sup>Ja'uc me te batem asatic yu'un li c'usi sventa vinajele; mu me ja'uc xbat asatic yu'un li c'usi sventa no'ox banamile. <sup>3</sup>Yu'un chamenoxuc xa ya'yel. Ja' xa cuxuloxuc ta sventa li Cristo ti junic xchi'uc Diöse. Ja' te nac'al ta stojol li acuxlejaliq. <sup>4</sup>C'alal chtal li Cristo ti ja' xa acuxlejaliq, co'ol chac'ot achi'uquic, co'ol alequil avutsil achi'uquic.

—Colosenses 3:1-4

<sup>24</sup>Yu'un li boch'otic oyic xa ta stojol Cristo Jesuse, laj xa yaq'uic ta milel ta cruz li stalel sbec'talique, li c'usitic tsc'ane, xchi'uc li c'usitic nopen xa'ay spasele. <sup>25</sup>Ja' yu'un me ja' xa cuxulutic ta sventa li Ch'ul Espiritue, ja' xa ta jpastic batel li c'usitic tsc'ane. —Gálatas 5:24, 25

<sup>2</sup>¡Mu lecuc! Yu'un me chamenutic xa ta sventa li muliletique, ¿c'u x'elan xu' chijcuxiutic yan velta ta spasel? <sup>11</sup>Ja' no'ox jech ec li vo'oxuque tsc'an ti chamenoxuc o chava'yic ta sventa li mulile; tsc'an ja' cuxuloxuc ta stojol Dios ta sventa ti avich'ojtic ta muc' li Cristo Jesuse.

—Romanos 6:2, 11

## HOY C'UXLEJAL SBATEL OSIL

Li boch'o ja' no'ox ta sts'un c'usi tsc'an sbec'tale, ja' chc'ot sc'ajbe sat li c'usi tsc'an sbec'tale, ja' li ch'ayeale. Yan li boch'o ja' tsts'un c'usi tsc'an Ch'ul Espiritue, ja' chc'ot sc'ajbe sat li yabtel Ch'ul Espiritue, ja' li cuxlejal sbatel osile. —Gálatas 6:8

<sup>14</sup>“A'yo ava'ay, jech chac c'u cha'al la stoy muyel ta toyol sloc'obal chon ta xocol banamil li Moisés ta vo'onee, ja' jech ta xquich' toyel muyel ec, vu'un ti Xnich'on cristiano lic'ote. <sup>15</sup>Yu'un jech xu' chcuxiic sbatel osil li boch'otic ta xch'unicune.” —Juan 3:14, 15

“Ti jech ta xcuxiic sbatel osile, yu'un xayotquinicot ti atuc no'ox bats'i cuxul Diosote, xchi'uc xotquinic noxtoc li Jesucristo laj atac tale.” —Juan 17:3

Li boch'o chch'un ti ja' Jcoltavanej li Nich'onile ja' chcuxi sbatel osil. Yan li boch'o mu sc'an xch'une mu xbat yil lequilal sbatel osil. Ja' xa no'ox oy ta sventa li tsots stojol mulil chac' Diose. —Juan 3:36

Yan li jmotontic chiyac'butic Dios ta sventa ti jun oyutic jchi'uctic li Cajvaltic Cristo Jesuse ja' li cuxlejal sventa sbatel osile. —Romanos 6:23b

“Jamal ta xcalboxuc ava'yic. Li boch'otic ta xa'ibun jc'ope, me ta xch'unic li boch'o la stacun tale, oy xcuxlejalic ta sventa sbatel osil. Mu'yuc xa chbat stoj smulic, yu'un icom xa yu'unic li lajele. ljelovic xa ta sventa cuxlejal.” —Juan 5:24

<sup>9</sup>Yutsil yo'nton stuc laj yic'utic.... <sup>10</sup>Li' ta orae ivinaj xa ta sventa ti ital li Cristo Jesuse, ja' li Jcoltavanej cu'untique. Ja' la stsalbe svu'el li lajele, xchi'uc ja' ta sventa Lequil A'yej laj yac' ta na'el ti oy cuxlejal ti mu sna' xlaje. —2 Timoteo 1:9b-10



## SC'AN TAJ SA'TIC TI C'UXLEJAL SBATEL OSILE

Jech noxtoc li Ch'ul Espiritue ja' chac' jna'tic ta co'ntontic ti ta meel xnich'nabutic xa Diose.

—Romanos 8:16

<sup>11</sup>Li c'usi yaloj Diose ja' li'i: Ja' ti chiyac'butic cuxlejal sventa sbatel osile. Li cuxlejal sventa sbatel osile ja' te oy ta stojol li Xnich'one. <sup>12</sup>Li boch'o xch'unoj ti ja' Xnich'on Diose, oy xa xcuxlejal sventa sbatel osil. Yan li boch'o mu'yuc c'otem ta yo'nton li Xnich'on Diose, mu'yuc xcuxlejal sventa sbatel osil. <sup>13</sup>Vo'oxuc ti ach'unojic xa li Xnich'on Diose, la jts'ibaboxuc tal li'i, yu'un jech ac'o ana'ic ti oy xa acuxlejalic sventa sbatel osile.

—1 Juan 5:11-13

“Li boch'o te oy ta yo'nton li jmantaltaque, me ta xch'une, le'e ja' li boch'o sc'anojicune. Li boch'o sc'anojicune ta xc'anatic yu'un ec li Jtote. Jech jc'anojic ec; ta xcac' jba ta ilel ta stojolic -xi li Jesuse.”

—Juan 14:21

Li tuq'uil chapanele chlamaj c'op yu'un; li lequil coltaele chac' jun co'ntontic, mu'yuc c'op-o'nton chca'itic o yu'un.

—Isaías 32:17

Ta sventa ti lac'otic xa ta xnich'nab Diose, jech la stac tal li Ch'ul Espiritu yu'un Xnich'one; laj yac' ochuc ta avo'ntonic. Ja' ta sventa ti “Tati” xavutic xa li Diose.

—Gálatas 4:6

Ti c'u x'elan ta jna'tic ti oyutic ta stojol Diose, xchi'uc ti li' nacal ta co'ntontic eq'ue, ja' ti laj xa yac'butic li Ch'ul Espiritu yu'une.

—1 Juan 4:13

Me ta jch'unbetic li smantaltac Diose, jech ta jna'tic o ti xcotquintic xae.

—1 Juan 2:3

## TIMI HOY TA C'ONTONTIC TI CRISTOE TA XAC MUYUVAJEL CH'IUC JUN C'ONTONTIC

“Li' ta orae ta xa xital ta atojol. Ti jech laj cal c'alal li' to oyun ta banamile, yu'un jech j'ech'el ac'o cuxetuc no'ox yo'ntonic o.”  
—Juan 17:13

“Pero ta to xajq'ueloxuc. Jech xcuxet no'ox avo'nton chava'yic; mu'yuc boch'o xu' chaspojboxuc o li xcuxetel avo'ntonique.”  
—Juan 16:22b

Yu'un li ventainel chac' Diose ma'uc te chvinaj ta sventa c'usi ta jve'tic, c'usi ta xcuch'tic. Ja' chvinaj ta sventa ti tuc' c'usi ta jpasteque, ti jun co'ntonique, ti xcuxet no'ox co'ntontic ta sventa li Ch'ul Espiritue. —Romanos 14:17

Xu' chaloq'ues avuch'ic ta xcuxetel avo'ntonic ec li vo' te ta nio' yo' bu chlic tal coltaele.  
—Isaías 12:3

“Ja' yu'un co'ol lijoc'anat ta cruz jchi'uc Cristo ic'ot. Jech muc xa vu'ucun ti li' cuxulune. Ja' xa Cristo li' cuxul ta jtojol. Li jcuxlejal li' quich'oj ta jbec'tal ta orae, cuxul ta sventa xch'unojel co'nton ta stojol li Xnich'on Diose, ja' li Boch'o ep la sc'anune, ti laj yac' sba ta milel ta jcoje.”  
—Gálatas 2:20

“Ti jech laj calboxuc scotole, yu'un jech xu' chavich'ic o li xcuxetel co'ntone. Jech xcuxet no'ox avo'ntonic scotol c'ac'al; mu'yuc c'usi sc'an chava'yic o.”  
—Juan 15:11

Chavac'bun quil sbelal cuxlejal. Toj xcuxet no'ox te ta atojol; toj jun yutsil o sbatel osil te yo' bu oyote.  
—Salmos 16:11

Li vo'oxuque ac'anojic xa li Cajvaltíc Jesucristoe, ac'o me mu'yuc to avilojic. Li' ta orae ach'unojic xa, pero mu'yuc to chavilic. Ja' yu'un toj xcuxet no'ox avo'ntonic, toj yan sba yutsil chava'yic, mu xa xana' c'usi chavalic.  
—1 Pedro 1:8

## MIJ JC'ANOJTIC TI CAJVALTIC, TA XIJ C'OT TA YAJ CH'AN COP

Ac'o me lec xu' cu'un chic'opoj ta sc'op ep ta chop cristianoetic, xchi'uc ta sc'op j'almantaletic, pero me mu jna' xic'anvane, ja' jech chic'ot jech chac c'u cha'al campano ti jeche' no'ox sts'int's'one, o jech chac c'u cha'al sepsep taq'uin ti jeche' no'ox xchac'chune. —1 Corintios 13:1

<sup>22</sup>Yan li yabtel Ch'ul Espiritue ja' jech chac li'i: ta jc'anan jbatic, xcuxet no'ox co'ntontic, jun no'ox co'nton jcotoltic, oy smuc'ul co'ntontic, lec no'ox chijc'opojutic, oy slequil co'ntontic, oy xch'unojel co'ntontic, <sup>23</sup>mu jtoybaucuc, jna'tic spajesel jbatic. —Gálatas 5:22, 23a

Jech lic sjac'be xchibal velta: —Simón, xnich'onot Jonás, ¿me lec chac'anun? —xut. Itac'ov li Pedroe: —Lec, Cajval, xana' ono'ox ti lec jc'anojote —xut. Li Jesuse jech laj yalbe: —Chabibun me lec li muc'tic chijetic cu'une —xut. —Juan 21:16

Pero me oy boch'o jech ta xal: “Li vu'une lec jc'anoj Diose”, me xie, pero me xti'et yo'nton yu'un xchi'ile, ja' j'epalc'op. Yu'un li boch'o mu sc'an xchi'il ti chil ta sate, ¿c'uxi xu' ta sc'an li Dios ti mu xilbe sate? —1 Juan 4:20

Me jech chapasique, jech ta sna'ic o scotol cristianoetic ti vo'oxuc cajchanc'opoxuque —xut yajchanc'optac li Jesuse. —Juan 13:35

Li vu'utique jna'ojtic ti lijloc'utic xa ta sventa lajele, ti ja' xa lij'ochutic ta sventa cuxlejale, yu'un jc'anojtic xa li jchi'iltactique. Yan li boch'o mu sc'an xchi'ile, te to oy ta sventa lajel. —1 Juan 3:14

Me jc'anojtic o li Diose, ta jch'unbetic li smantaltaque. Mu'yuc tsots ta ch'unbel chca'itic li smantaltaque.

—1 Juan 5:3

## SC'AN TAXCALVETIC SCOPLAL TI CRISTOE

Scotol cristiano ta jujuchop c'op chlic yalic ta jamal ti ja' Ajvalil stuc li Jesucristoe; jech ich'bil ta muc' chc'ot li Dios Totile. —Filipenses 2:11

<sup>32</sup>“Li boch'o jamal chalic ta stojol cristianoetic ti xch'unojbicun jc'ope, ja' no'ox jech ec li vu'une jamal chcal ta stojol Jtot te ta vinajel. <sup>33</sup>Yan li boch'o chismucun ta yo'ntone, ja' no'ox jech ta jmuc ta co'nton ec ta stojol li Jtot te ta vinajele.” —Mateo 10:32, 33

Ja' jech xu' chavotquinic me ja' ventainbilic yu'un li Espiritu yu'un DiOSE: Me jamal chalic ti i'ay yich' sbec'tal li' ta banamil li Jesucristoe, ja' ventainbilic yu'un li Espiritu yu'un DiOSE. —1 Juan 4:2

Li boch'o ta xal ta jamal ti ja' Xnich'on Dios li Jesuse, te oy Dios ta yo'nton, jech ec li stuque te oy ta stojol li DiOSE. —1 Juan 4:15

<sup>9</sup>Yu'un me chloc' ta ave ti ja' Avajval li Jesuse, xchi'uc me chach'un ta avo'nton ti icha'cuxesat yu'un DiOSE, chacol sbatel osil. <sup>10</sup>Yu'un ta co'ntontic tsc'an ta jch'untic ti jech xu' tuc' co'ntontic chijyilutic DiOSE. Xchi'uc tsc'an chloc' ta quetic ta jamal ti jech xu' chijcolutique. —Romanos 10:9, 10

Li boch'o chalic ti mu ja'uc Xnich'on Dios li Jesuse, mu xich'ic ta muc' noxtoc li Totile. Yan li boch'o jamal chal ti ja' Xnich'on Dios li Jesuse, yu'un yich'ojic ta muc' noxtoc li Totile. —1 Juan 2:23

Yu'un li boch'o ta xq'uexov ta jtojol, xchi'uc chq'uexov ta xch'unel jc'ope, ja' no'ox jechun ec vu'un ti Xnich'on cristiano lic'ote chiq'uexov yu'unic c'alal chital xchi'uc jxjobal, xchi'uc xjobal Jtot, xchi'uc xjobal li j'almentaletique. —Lucas 9:26

## TZOTZ SCOPLAL TAJ CH'UNBETIC TI DIOSE

<sup>37</sup>Itac'ov li Jesuse: –'C'ano me ta scotol avo'nton li Dios avu'une, xchi'uc ta scotol ach'ulel, xchi'uc ta scotol ajol', xi li mantale. <sup>38</sup>Ja' sba mantal ti bats'i tsots sc'oplale.

—Mateo 22:37, 38

Yu'un xana'ic, me chcac' jbatic ta mozoinel yu'un jun cristiano, ja' chispasutic o ta mantal. Ja' no'ox jech ec, me ja' chcac' spasutic ta mantal li mulil ti ja' chac' lajele, smozoutic chijc'ot o. Yan me ja' chcac' spasutic ta mantal li c'usitic tuq'ue, smozoutic chijc'ot noxtoc.

—Romanos 6:16

<sup>7</sup>Vo'oxuc ti chavich'ic vocol li' ta orae, co'ol ta jcux co'ntontic c'alal chyal tal ta vinajel li Cajvaltic Jesucristoe xchi'uc li yaj'al mantaltac ti ech'em svu'elique. <sup>8</sup>Ta xyal tal xchi'uc natiqil yat c'oc', yu'un ja' chtal yac'be stoj smul li boch'otic mu xotquinic Diose, ti mu sc'an xch'unic li Lequil A'yej yu'un Cajvaltic Jesucristoe. <sup>9</sup>Le'e tsts'ic svocolic o ta ch'ayel sbatel osil. Nom oyic o ta stojol li Cajvaltique. Mu xilbeic o slequilal xchi'uc svu'el.

—2 Tesalonicenses 1:7-9

“¿C'u yu'un 'Cajval, Cajval' xavuticun, me mu xac'an xapasic c'usi chacalboxuque?”

—Lucas 6:46

<sup>26</sup>“Li' ta orae, oy chib li c'usi chcac' at'ujique: bendición xchi'uc vocoletic. <sup>27</sup>Chavich'ic bendición me chach'unic li smantaltac Muc'ul Dios li' chacalboxuc ta orae. <sup>28</sup>Chata ep avocolic me ja' chbat avich'ic ta muc' li yan diosetic.”

—Deuteronomio 11:26-28a

## LI PUCUJE JA'CAJ CONTRATIC TI MUX XBINAJ TA Q'UELELE



<sup>8</sup>Bijanic me, viq'uuluc me asatic yu'un li avajcontraique, ja' li pucuje, yu'un xjoyet no'ox jech chac c'u cha'al león ti x'avet no'ox ta sa'el li boch'o tsc'an tsti'e.

<sup>9</sup>Contrainic li pucuje. —1 Pedro 5:8, 9a

<sup>1</sup>Li Jesuse ja'o i'ic'at batel yu'un Espiritu ta xocol banamil yu'un ac'o q'uelbatuc yo'nton yu'un li banquialal pucuje. <sup>10</sup>Ja' yu'un li Jesuse jech laj yalbe: —Batan, Satanás. Yu'un jech ts'ibabil ta sc'op Dios: 'Ja' no'ox xavich'ic ta muc' stuc li Cajvaltique, ja' li Dios avu'une, ja' no'ox xaquejan aba ta stojol', xi ts'ibabil —xut. <sup>11</sup>Jech ibat li pucuje. Ta ora ital j'almentaletic, tal scoltaic li Jesuse.

—Mateo 4:1 y 10, 11

<sup>10</sup>Slajeb xa chacalboxuc tal, oyuc me lec atsatsalic ta sventa ti jun oyoxuc xchi'uc li Cajvaltique, xchi'uc ta sventa li svu'el ti toj ech'em stsatsale. <sup>11</sup>Lapic me scotol li amaquic, li avabtejebic yac'oj Diose, yu'un jech chcuch avu'unic li lo'lael chac' tal li pucuj ti toj lec ya'yele.

—Efesios 6:10, 11

<sup>10</sup>Me laj apasbeic perdón li vo'oxuque, jech ta jpasbe perdón ec.... <sup>11</sup>Yu'un jech mu xcac'betic spas canal ta jtojoltic li banquialal pucuje, yu'un jna'ojtic xa li c'usi oy ta yo'nton tspase.

—2 Corintios 2:10, 11

Li j'elec' chije [Satanás] ja' no'ox yabtel ta x'elc'aj, ta xmilvan, ta soquesvan.

—Juan 10:10a

...Yu'un li stuque jmilvanej ono'ox ta sliquebal. Mu ono'ox sc'an o li c'usi melele; mu'yuc c'usi melel oy ta yo'nton. ...ja' j'epalc'op o, ja' mero sme' j'epalc'op.

—Juan 8:44b

## XU'CU'UNTIC STZALEL TI PUCUJE TA SVENTA CAJVALTIC

Jech chac c'u cha'al oy xch'ich'al, oy sbec'tal li xnich'nabtaque, ja' no'ox jech ic'ot ec li stuque. Ja' yu'un c'alal ichame, la slajesbe o stsatsal li boch'o sventainoj lajele, ja' li pucuje. —Hebreos 2:14

Yan li boch'o ta to sa'ilan smule te to oy ta sc'ob pucuj. Yu'un li pucuje ja' la sliques li mulil ta sliquebale; ja' jech yabtel o. Ja' yu'un ital ta banamil li Xnich'on Diose, ja' tal slajesbe stsatsal yabtel li pucuje. —1 Juan 3:8

“Vo'ot chc'ot avic'be satic, yu'un jech xu' chtalic ta sac osil, jech xu' tscomtsanic li ic' osile. Jech xu' ta xloq'uic ta sc'ob li Banquialal Pucuje; ja' chlic ochicuc ta sc'ob li Diose. Jech xu' ta xlic xch'unicun, jech ta spasbatic perdón yu'un smulic. Jech xu' chich'ic ec li c'usi sc'oplal chich'ic li boch'otic voc'bilic xa cu'une', xiyutun li Cajvaltique.” —Hechos 26:18

<sup>35</sup>¿Boch'o xu' tspajes ti ep sc'anojutic li Cristoe? ¿Me xu' chpaj yu'un li uts'intaele, li tsatsal vocole, li nutsele, li vi'nale, ti mu'yuc jc'u'tique, li c'usi xi'bal sbae, xchi'uc li milele? <sup>37</sup>Pero scotol le'e lec tsalbil chc'ot cu'untic ta sventa li boch'o sc'anojutique. —Romanos 8:35 y 37

<sup>7</sup>Ja' yu'un ac'o abaic ta sc'ob li Diose. Ja' contrainic li pucuje, jech chjatov loq'uel ta atojolic. <sup>8</sup>Nopajanic ta stojol li Diose, jech chnopaj ta atojolic ec. —Santiago 4:7, 8a

Li' ta orae ta xa xich' chapanel li cristianoetic li' ta banamile. Li' ta orae ta xa xich' jipel loq'uel li banquialal jpasmantal li' ta banamile. —Juan 12:31

## CHA'CUXIJ LI CRISTOE



C'alal cha'cuxem xa'ox Jesús ta sob ta sba sc'ac'alil xemunae, ja' ba'yuc laj yac' sba ta ilel ta stojol li María liquem tal ta Magdalae, ja' ti iloq'uesbat vucub pucuj ta yo'ntone.

—Marcos 16:9

<sup>26</sup>C'alal iloc' vaxquib c'ac'ale, te tsobolic yan velta ta na li yajchanc'optac Jesuse. Te xa'ox xchi'uquic li Tomase. Lec macal yu'unic li ti'nae. Ta ora no'ox te ivinaj ta o'lol yut na li Jesuse. Jech laj yal: —Junuc avo'ntonic —xi.

<sup>27</sup>Li Jesuse jech laj yalbe li Tomase: —Q'uelavil li jc'obe, ac'o ac'ob li'i. Tic'o ac'ob noxtoc li' ta jxocone. Mu me xapas ta tsots avo'nton; paso aba ta mero jch'unolajel —x'utat. <sup>28</sup>Ja' yu'un li Tomase jech laj yalbe li Jesuse: —¡Cajval cu'un, Dios cu'un! —xut.

—Juan 20:26-28

<sup>39</sup>Vu'uncutic laj quilcutic lec scotol c'usi la spas te ta Judea banamil xchi'uc ta Jerusalén. Ja' li boch'o la smilic, la sjoc'anic ta cruze. <sup>40</sup>Pero Dios la xcha'cuxes loq'uel ta yoxibal c'ac'al, xchi'uc jech la sc'an Dios ti laj yac' sba ta ilele. <sup>41</sup>Pero muc ta scotoluc cristiano laj yac' sba ta ilel. Ja' no'ox laj yac' sba ta ilel ta jtojolcutic, vu'uncutic ti t'ujbiluncutic ono'ox yu'un Dios sventa chcalcutic li c'usi laj quilcutique. Jech la jchi'incutic ta ve'el ta uch' vo' ti c'alal cha'cuxem xa'oxe.

—Hechos 10:39-41

Ja' ti i'ac'at ta milel ta scoj jmultique, xchi'uc ti icha'cuxesat loq'uel ta smuquinal ta sventa mu'yuc jmultic chijyilutic Diöse.

—Romanos 4:25



## JA'SPATOVIL C'ONTONTIC TA SVENTA TI CHA'CUXIJEM TI CRISTOE

<sup>25</sup>“Li boch’otic ta xa’yic jc’ope ta xcuxiic. <sup>28</sup>Mu me toj ch’ayeluc ta xc’ot avo’ntonic ta sventa ti jech laj calboxuque. Yu’un ta to me sta sc’ac’alil ta xa’ibicun jc’opojel scotol li boch’otic oyic ta smuquinalique. <sup>29</sup>Li boch’otic lec c’usi la spasique ta xcha’cuxiic loq’uel sventa chcuxiic sbatel osil. Yan li boch’otic chopol c’usi la spasique ta xcha’cuxiic loq’uel sventa chbatic ta tojob mulil.”

—Juan 5:25b y 28, 29

<sup>3</sup>¿Me mu xana’ic ti co’ol lijchamutic o jchi’uctic Cristo ti c’u quepaltic laj quich’tic vo’ ta sventa li Cristo Jesuse? <sup>4</sup>Ta sventa ti laj quich’tic vo’e, co’ol lijmucaturic jchi’uctic Cristo noxtoc. Ta sventa ti lijchamutique, jech xu’ chijcha’cuxiutic noxtoc jech chac c’u cha’al icha’cuxesat ta stsatsal Dios li Cristoe, jech ach’ xa jtaletic chquich’tic. <sup>5</sup>Yu’un me co’ol lijmucaturic jchi’uctic Cristo ta sventa ti jun oyutic jchi’uctique, ja’ jech chijcha’cuxiutic ec jech chac c’u cha’al icha’cuxi li Cristoe.

—Romanos 6:3-5

<sup>10</sup>Me te xa nacal ta avo’ntonic li Cristoe, chacuxiic sbatel osil, yu’un tuc’ xa avo’nton chayiloxuc li Diose, ac’o me chcham li abec’talic ta scoj ti jech icom ta sventa li mulile. <sup>11</sup>Me te xa nacal ta avo’ntonic li Espiritu ti la xcha’cuxes loq’uel ta smuquinal li Jesuse, ja’ jech ta xcha’cuxesboxuc ec li abec’talic ti stalel chchame. Ti jech ta xcha’cuxesboxuc abec’talique, ja’ ta sventa li Espiritu yu’un Dios te oy ta avo’ntonique.

—Romanos 8:10, 11

## SC'AN HOYUC JLEQUIL JTUQUILTIC TA STOJOL TI DIOSE

<sup>68</sup>“Coliyal li Cajvaltlic Diose, ja' li Dios yu'un Israele, yu'un tal xa sq'uelutic, tal xa scolta li steclumale, ...<sup>74</sup>ti chispojutic loq'uel ta sc'ob cajcontratique. Jech mu'yuc xa xi'el chca'itic, xu' chijtunutic yu'un, <sup>75</sup>yu'un lecubtasbilutic, tuq'uibtasbilutic yu'un ti jayib c'ac'al cuxulutic ta stojole.”

—Lucas 1:68 y 74, 75

Ja' yu'un vo'oxuc ti lec jc'anojoxuque, ja' jc'oplaltic ti va'ay x'elan yaloj li Diose. Jech tsc'an ac'o me jq'uel jbbatic ta sventa li c'usi tsoques jbec'taltic xchi'uc co'ntontique. Ja' tsc'an chijlecubutic o batel ta sventa ti quich'ojtic xa ta muc' li Diose.

—2 Corintios 7:1

<sup>1</sup>Quermanotac, oy to c'usi chacalboxuc tal. Ta jc'anboxuc vocol ta atojolic, ta jtaquioxuc ta sventa li Cajvaltlic Jesuse, jech me xapasic o batel jech chac c'u cha'al laj achanic ta jventacutique, yu'un ja' no'ox jech tsc'an chapasic o, jech lec chil li Diose. Ech'em to jech tsc'an chapasic batel. <sup>2</sup>Yu'un xana'ic lec c'usi chanubtasel laj calcutic comel ava'yic ta sventa li Cajvaltlic Jesuse. <sup>3</sup>Yu'un li c'usi oy ta yo'nton Diose, ja' ti ac'o lecubanic batele, ti ac'o acomtsanic li mulivajele. <sup>4</sup>Jujunoxuc tsc'an ac'o ana'ic lec c'u x'elan chaventain abec'tal atuquic; tuc' xapasic ta stojol, ich'ic me ta muc'. <sup>7</sup>Yu'un muc ic'biluticuc yu'un Dios sventa ac'o jpastic c'usi tsc'an jbec'taltic; ja' ic'bilutic sventa ac'o lecubcutic batel.

—1 Tesalonicenses 4:1-4, 7

<sup>15</sup>Ja' chanbeic stalel li Boch'o laj yic'oxuc ta stojole, yu'un li stuque tuc' yo'nton. Jech tsc'an tuc' scotol c'usi chapasic ec li vo'oxuque. <sup>16</sup>Yu'un jech ts'ibabil ta sc'op Dios: “Tuc'uc me avo'ntonic, yu'un li vu'une tuc' co'nton”, xi ts'ibabil.

—1 Pedro 1:15, 16

## SC'AN HOYUC JLEQUIL JTUQUILTIC TA STOJOL TI DIOSE

Pero li' ta orae colemoxuc xa ta mozoil ta sventa li c'usitic chopole; ja' xa yajtuneloxuc li Diose. Jech ja' xa chataic li c'usitic leque, ja' ti yantic chalecubic batele. Le'e ja' chac' acuxlejalic sventa sbatel osil.

—Romanos 6:22

Xchi'uc la st'ujutic ta sventa Cristo ti c'alal mu'yuc to'ox banamile, yu'un jech mu'yuc jmultic, mu'yuc quic'ubaltic chiyilutic, yu'un c'anbilutic ono'ox yu'un. —Efesios 1:4

Tsc'an ja' xa chalapbeic stalel li ach' cristiano ti pasbil jech chac c'u cha'al stuc li Diose, ti tuq'ue ti me jutuc mu'yuc smule.

—Efesios 4:24

Ta xlic yich' jamel lec be te ta yut, ja' "ch'ul be" sbi chc'ot. Li boch'otic oy yi'lalique mu xu' chjelovic te.

—Isaías 35:8a

---

Yan me jamal chcalbetic Dios li jmultique, chispasbutic perdón, chispocbutic loq'uel scotol sbolil co'ntontic. Yu'un li stuque tuc' yo'nton, meel c'usi chal.

—1 Juan 1:9

---

Ta sventa ti chlaj ta c'oc' scotol li c'usitic oye, jech tsc'an ti lec, ti tuc' chapas abaique. Tsc'an ti j'ech'el chavich'ic o ta muc' li Diose.

—2 Pedro 3:11

Tsotsuc me sc'oplal o chava'yic ti co'ol avo'nton acotolique, xchi'uc ti tuc'uc avo'ntonic scotol orae. Yu'un me mu'yuc tuq'uiben co'ntontique, mu xu' chbat jq'uelbetic sat li Cajvaltique.

—Hebreos 12:14

Alic ti toj muc', ti toj jun yutsil sbi li Muc'ul Diose; ich'ic ta muc' te ta xch'ulna li Muc'ul Diose.

—Salmos 29:2

## NOJUCOTIC TA XCH'UL ESPÍRITU TI DIOSE

“Vo'oxuc ti chopoloxuc ono'oxe, xana'ic c'usi lec chavac'beic li anich'nabique. ¡Buuc xa li Atotic te oy ta vinajele Ch'ul Espíritu chac'be li boch'otic ta sc'anique!”  
—xi li Jesuse. —Lucas 11:13

C'alal ilaj yo'ntonic ta sc'opanel Diose, inic li na yo' bu tsobolique. Scotolic inoj ta yo'ntonic stsatsal li Ch'ul Espiritue. Jech jamal laj yalic batel li sc'op Diose; mu'yuc xi'el laj ya'yic. —Hechos 4:31

“Ta xcac'boxuc ta atojolic li espíritu cu'une; ta xcac' c'otuc ta pasel avu'unic li mantaletic, li chanubtaseletic cu'une. Ja' ta xcac' apasilanic o batel.” —Ezequiel 36:27

Pero li vo'oxuque mu xa ja'uc chapasic c'usi tsc'an li abec'talique; ja' xa chapasic c'usitic tsc'an Espíritu yu'un Dios me te xa nacal ta avo'ntonique. Yu'un li boch'o mu'yuc yich'oj li Espíritu yu'un Cristoe ma'uc yu'un Cristo. —Romanos 8:9

Pero c'alal me laj avich'ic li Ch'ul Espiritue, chavich'ic avu'el atsatsalic... —xi li Jesuse. —Hechos 1:8a

Yu'un li Bernabee ja' lequil vinic, ventainbil yo'nton yu'un Ch'ul Espíritu, xchi'uc oy lec xch'unojel yo'nton. —Hechos 11:24a

Li jch'unolajeletic te ta Pisidia banamile toj xcuxet no'ox yo'nton icomic, xchi'uc iventainbat lec yo'ntonic yu'un li Ch'ul Espiritue. —Hechos 13:52

Mu me xayacubic, yu'un ja' chabolibic yu'un. Ja' ac'o nojuc ta avo'ntonic li Ch'ul Espiritue. —Efesios 5:18

## HOY C'USI SPATOBIL C'ONTONTIC TA STOJOL DIOS TI BUCH'U JCHUNOJTIC TI CRISTOE

Li Muc'ul Diose nopol oy ta stojol li boch'o oy svocol yo'ntonique; tscolta li boch'o lajem stsatsal yo'ntonique.

—Salmos 34:18

Yu'un vu'un cabtel scotol li c'usitic oye; vu'un la jpas scotol. “Li boch'o oy ta co'ntone ja' li boch'o biq'uit chac sbaique, ti chat yo'nton yu'un smulique, xchi'uc ti chich'ic ta muc' li jc'oje.”

—Isaías 66:2

Li Jesuse jech laj yalbe: —Me chach'une, xu'. Yu'un scotol xu' tspasbat li boch'o ta xch'une —xi. —Marcos 9:23

<sup>12</sup>Vo'oxuc ti lec jc'anojoxuque, mu me ch'ayeluc chc'ot avo'ntonic ta sventa li tsatsal vocol chavich'ique, yu'un ja' sventa chich' q'uelel avo'ntonic. Mu me xanopic ti atuquic xa no'ox jech chavich'ic vocole. <sup>13</sup>Ja' tsc'an cuxetuc no'ox avo'ntonic, yu'un co'ol chavich'ic vocol jech chac c'u cha'al laj yich' vocol li Cristoe. Jech xcuxet no'ox avo'ntonic noxtoc ti c'alal tsta yorail chtal xchi'uc slequilal yutsilale.

—1 Pedro 4:12, 13

“Li Diose ta scusbe loq'uel scotol ya'lel satic, jech mu'yuc xa boch'o chcham, mu'yuc xa boch'o chat yo'nton, mu'yuc xa boch'o ch-oc', mu'yuc xa boch'o c'usi c'ux cha'ay. Yu'un ilaj xa sc'oplal scotol ti jech to'ox oy ta ba'yuque”, xi li boch'o ic'opoje.

—Apocalipsis 21:4

Ja' pato avo'ntonic yu'un li Muc'ul Diose; ja' pasic li c'usitic leque xchi'uc li c'usitic melele, jech jun avo'nton chanaquic ta banamil.

—Salmos 37:3

Ja' yu'un tsc'an ba'yuc chavac' abaic ta ventainel yu'un li Diose, xchi'uc ti chapasic c'usi tsc'ane, jech chayac'boxuc scotol li c'usitic ta xtun avu'unique.

—Mateo 6:33

## LAJ YAL COMEL C' USITIC YU 'UN LOLAEL

Ta sventa ti laj ya'ay lec ta sbec'tal stuc li prevae, jech xu' yu'un tscolta ta sventa svu'el li boch'otic jech chtal preva ta stojolic eq'ue. —Hebreos 2:18

Li Dios ti chac' jun co'ntontique ja' ta xpech'boxuc ta teq'uel li banquihal pucuje, chayac'boxuc ta yolon avacanic. —Romanos 16:20a

“C'alal chatuch' jelovel muc'tic nabe, te chajchi'inot; c'alal chatuch' jelovel uc'umetique, mu xaxcuchot batel; c'alal chajelov ta o'lol coq'ue.” —Isaías 43:2a

Li vo'oxuque mu'yuc to bu chtal ta atojolic tsots preva ti mu'yuc boch'o c'otem ta stojol jeche. Yu'un li Diose mu sna' sjel yo'nton o, jech mu xac' taluc ta atojolic tsots preva ti me mu xa sts'ic avu'unic chile. Jech noxtoc c'alal oyoxuc ta prevae, ja' chac' avilic c'u x'elan xu' chacolic loq'uel, yu'un jech chcuch avu'unic. —1 Corintios 10:13

Toj ep tsta svocol li boch'o tuc' yo'ntonique, pero ta xcoltaatic yu'un li Muc'ul Diose. —Salmos 34:19

Ja' yu'un, scotol li boch'otic sc'anojic Diose, ti ic'bilic ta sventa ti jech oy ta yo'nton stuque, ta jna'tic ti ja' sventa slequilalic scotol li c'usi chc'ot ta pasele. —Romanos 8:28

Yu'un mu ja'uc jun banquihal pale cu'untic ti mu sna' c'u x'elan jvocoltic ta scoj ti mu'yuc jtsatsaltique. Ja' jun Banquihal Pale ti laj yich' pasbel preva scotol jech chac' c'u cha'al vu'utique, pero li stuque mu'yuc smul. —Hebreos 4:15

## LAJ YAL COMEL TI BUCH'U SHU YU'UNE

“Li boch’o ttsal yu’un scotole, ja’ chcac’be sventain scotol. Vu’un Diosun yu’un chic’ot. Ja’ jnich’on chc’ot o ec”, xiyutun.  
—Apocalipsis 21:7

“Li boch’o ttsal yu’un scotole ja’ chcac’ c’otuc ta yoyal xch’ulna li Dios cu’une; mu xa xloc’ o. Ta jts’ibabe ta stojolic sbi li Dios cu’une xchi’uc sbi li lum yu’un Dios cu’une, ja’ li ach’ Jerusalén chlic tal ta vinajel yo’ bu oy li Dios cu’une. Xchi’uc ta jts’ibabe ta stojolic noxtoc li ach’ jbie”, xiyutun.  
—Apocalipsis 3:12

“Li boch’o ttsal yu’un scotole ja’ jech sac sc’u’ tslapic, xchi’uc mu’yuc ta jtu’pbe ta vun sbiic sventa cuxlejal sbatel osil, xchi’uc jamal chcalbe sbiic ta stojol li Jtote xchi’uc ta stojol li yaj’almantaltaque”, xiyutun.  
—Apocalipsis 3:5

Li boch’o ttsal yu’un scotole ta jchi’in ta chotlej ta jchotleb, jech chac c’u cha’al laj yac’ chotlicun jchi’uc li Jtote, yu’un itsal cu’un scotol.  
—Apocalipsis 3:21

“Li boch’o oy xchiquine, ac’o ya’ibe smelol c’usi ch-albat yu’un Ch’ul Espíritu li jujutsob jch’unolajeletique. Li boch’o ttsal yu’un scotole ta xcac’be slo’ic li sat te’ sventa cuxlejal sbatel osile, ja’ ti te oy ta o’lol ts’unubaltic yu’un Diose, xayutoxuc li Cajvaltique’, uto”, xiyutun.  
—Apocalipsis 2:7

“Li boch’otic ttsal yu’un scotole, ti jun yo’nton tspasic o c’usi ta jc’an c’alal to ta slajebe, ja’ chcac’be tsots yabtelic ta sventa scotol cristianoetic ta jujun banamil jech chac c’u cha’al yac’objun cabtel li Jtote”, xiyutun.  
—Apocalipsis 2:26

# TI DIOSE TA XALVE SCOPLAL TI BUCH'UTIC HOY TA YONTONIC TA SBAJ SBAIQUE

<sup>10</sup>Pero li boch'o nupul ts'acalic xae, chcalbeic jun mantal. Pero muc vu'cun jmantal; ja' smantal li Cajvaltique: Li antse mu me scomtsan li smalale. <sup>11</sup>Pero me chlic svoc' sbae, mu xa me xnupin o. Yan me tsc'an chnupine, ja' ac'o slecubtas sc'opic xchi'uc li smalal ono'oxe. Ja' no'ox jech ec li vinique mu me xicta li yajnile.... <sup>39</sup>Li ants ti oy xa smalale, chucul xa o ta sventa mantaletic li' ta banamil ti c'alal cuxul li smalale. Pero me icham li smalale, mu'yuc xa ich'bil ta venta. Xu' xa chnupin xchi'uc li boch'o tsc'ane, ja' no'ox venta me xch'unoj Cajvaltique.

—1 Corintios 7:10, 11 y 39

<sup>2</sup>Jech chac c'u cha'al jun ants ti nupinem ta sventa leye, chucul c'otem o ti c'alal cuxul li smalale. Pero me icham li vinique, colem chcom; mu'yuc xa ich'bil ta venta. <sup>3</sup>Pero me tsa' yan vinic ti c'alal cuxul to li smalale, jmulavil ants xi sc'oplal. Pero me icham li smalale, mu'yuc xa ich'bil ta venta chc'ot. Me chnupin xchi'uc yan vinique, mu xa x'albat ti ja' jmulavil antse.

—Romanos 7:2, 3

“Li boch'o ta xicta yajnile, me ta xic' yan antse, ja' no'ox ta xmulivaj xchi'uc. Jech ec, li boch'o ta xic' ictabil antse ja' no'ox ta xmulivaj xchi'uc”, xi li Jesuse. —Lucas 16:18

“Pero vu'un chacalboxuc, li boch'o ta xicta yajnile, me muc ta scojuc imulivaj xchi'uc yan vinique, xco'laj xchi'uc mulivajem chc'ot yu'un li yajnile. Li boch'o ta xic' yajnilin li ictabil antse, ja' no'ox ta xmulivaj xchi'uc”, xi li Jesuse.

—Mateo 5:32



## TA XCHATAL TA XCH'IBAL VUELTA LI CRISTOE

Me chibate, xchi'uc me ichapaj cu'un li avavilique, chisut tal yan velta; vu'un jtuc chtal quic'oxuc muyel, yu'un jech xu' te chac'otic ec ti bu oyune. —Juan 14:3

<sup>4</sup>Itac'ov li Jesuse:.... <sup>30</sup>“Ja'o ta xvinaj tal senyail ta vinajel ti chital, vu'un ti Xnic'on cristiano lic'ote. Scotol jaychop cristianoetic ta sbejel banamil ta x'oq'uic ta scoj xi'el. Ta xilic chiyal tal ta toc ta vinajel xchi'uc ep jtsatsal xchi'uc tsots jxjobal, vu'un ti Xnich'on cristiano lic'ote.”

—Mateo 24:4a, 30

Li boch'otic ta xq'uexov cu'un, xchi'uc ta xq'uexov ta xch'unel jc'op ta stojol li cristianoetic li' ta ora ti mu junuc yo'ntonic ta stojol Diose, xchi'uc ti chopol c'usitic tspasique, ja' no'ox jech vu'un ti Xnich'on cristiano lic'ote ta xiq'uexov yu'unic ec ti c'alal chital xchi'uc xjobal Jtot, xchi'uc li ch'ul j'almantaletic yu'une -xut. —Marcos 8:38

<sup>2</sup>Vo'oxuc ti lec jc'anojoxuque, xnich'nabutic xa li Diose, ac'o me mu to xvinaj c'u x'elan chijc'otutic. Pero jna'tic xa ti chijco'lajutic jchi'uctic Cristo c'alal ta xtale, jech ta to xcotquintic c'u x'elan. <sup>3</sup>Scotol li boch'otic jech spatoy yo'ntonic ta stojol li Cristoe ta xaq'uilan sbaic ta lecubtasel jech chac c'u cha'al lec li Cristoe. —1 Juan 3:2, 3

“Ja' no'ox jechoxuc ec li vo'oxuque, chapalucoxuc me. Yu'un c'alal mu'yuc chanopic chital vu'un ti Xnich'on cristiano lic'ote, ja'o chivul ta loq'uel”, xi li Jesuse.

—Lucas 12:40

<sup>24</sup>Li Jesuse jech laj yalbe:.... <sup>27</sup>Yu'un ta to sta sc'ac'alil chital xchi'uc xjobal Jtot, vu'un ti Xnich'on cristiano lic'ote. Ta jchi'in yalel tal li j'almantaletic cu'une, ja' ta xtal cac'be stojol jujun cristiano ti c'u x'elan la spasique -xut.

—Mateo 16:24a, 27

## LI SCOP DIOSE

“Li vinajel banamile ta xljaj, pero li jc’ope mu xljaj sc’oplal o.” —Lucas 21:33

Yu’un li sc’op Diose mu ta yo’ntonuc cristiano iloc’tal. Ja’ iventainatic yu’un Ch’ul Espiritu. Ja’ viniquetic ic’opojic ta sventa Dios. —2 Pedro 1:21

Yu’un scotol li sc’op Dios ts’ibabil comele ja’ laj yac’ ta na’el ta sventa svu’el stuc li Diose. Jech lec chtun ta sventa chanubtasel, ta sventa taq’uiel, ta sventa tuq’uibtasel, xchi’uc ta sventa bijubtasel ta spasel c’usi tuc’.

—2 Timoteo 3:16

Ja’ luz c’otem cu’un li ac’ope; ja’ toj c’otem cu’un sventa chquil jbe. —Salmos 119:105



## SCOPONEL DIOS XCH’IUC SNAEL YA’QUEL PERDÓN

<sup>9</sup>“Li vo’oxuque ja’ jech xac’opanic Dios chac li’i: ‘Jtotic Dios, te oyot ta vinajel, ich’biluc ta muc’ abi. <sup>10</sup>Ac’o sta yorail chapas mantal, ac’o pasuc c’usi tsc’an avo’nton li’ ta banamil jech chac c’u cha’al te ta vinajele. <sup>11</sup>Ac’bun jve’elcutic ta sventa li jun c’ac’al li’i. <sup>12</sup>Pasbuncutic perdón yu’un jmulcutic jech chac c’u cha’al jpasojbecutic perdón li boch’otic oy smul cu’uncutique. <sup>13</sup>Mu me xavac’ stsaluncutic li sujel ta mulile. Coltauncutic loq’uel ta sc’ob li pucuje’, xachiic ti c’alal chac’opanic Diose. <sup>14</sup>Yu’un me chapasbeic perdón li boch’o oy smul avu’unique, jech chaspasboxuc perdón yu’un amulic ec li Jtotic ta vinajele. <sup>15</sup>Yan me mu xapasbeic perdón li boch’o oy smul avu’unique, ja’ no’ox jech mu xaspasboxuc perdón ec li Jtotic te oy ta vinajele.” —Mateo 6:9-15

**Li c'usi la snop li Dios yo'xu'cha ta li acolele**

***Ta jc' an jun jcoltavanej.***

Yu'un scotol cristiano jpasmuliletic, bats'i nom oy ta stojolic slequilal li Diose. —Romanos 3:23

Ta scoj achopolil atuquic ti jech lic avoc' aba achi'uquic li Diose. —Isaías 59:2a

***Cristo y chan ta jmul.***

Yu'un li Cristoe laj ono'ox yich' vocol ec ti c'alal icham ta scoj jmultique. Jun no'ox velta j'ech'el la xch'aybutic o. Li stuque mu'yuc smul. —1 Pedro 3:18a

***Taj c'an ta jsutes jconton yu'un jmul.***

Li boch'o ta smuc smule mu'yuc lec chbat; yan li boch'o jamal chal, xchi'uc me tscomtsane, ch'aybil chc'ot smul. —Proverbios 28:13

Ja' yu'un jchi'iltac, suteso avo'ntonic, sutanic tal ta stojol Dios, yu'un jech xu' chavich'ic ch'aybel li amulique. —Hechos 3:19a

***Ta sc 'an xcich' Cristo ta xch' unel jconton.***

Yan li boch'otic la sc'anic, ti laj yich'ic ta muq'ue, i'albatic ti xnich'nab Dios xa ic'otic oe. —Juan 1:12

***Ta jna ti cuchal colemunxa yu'un cajval.***

Li boch'o xch'unoj ti ja' Xnich'on Diose, oy xa xcuxlejal sventa sbatel osil. —1 Juan 5:12a

“Jamal ta xcalboxuc ava'yic. Li boch'otic ta xa'ibun jc'ope, me ta xch'unic li boch'o la stacun tale, oy xcuxlejalic ta sventa sbatel osil. Mu'yuc xa chbat stoj smulic, yu'un icom xa yu'unic li lajele. Ijelovic xa ta sventa cuxlejal.”

—Juan 5:24

Ti mantaliletic ts'ibabil li'ta jun ch'in buneticque ja' xch'ul cop Dios ta Tzotzil yu'un Chamula, ja' sbentainojic ta stojolal jpas bunetic ta jlumaltic Mexico xchiuk ja' yamletic ta spasel.

A'yio be scoplal tic c' usi ta xal ti uni xch'in bun lie. Yo' jech cha ta bijumtasel ta sbenta ti scop Diose: **[www.wmp-contacts.org](http://www.wmp-contacts.org)**

Free — not to be sold

Ta sbejel pucbil batel ti bun lie ja'ic ti buchutic yi'choj.

Yaniletic ta spael ti bun li'e.

World Missionary Press, Inc.

PO Box 120, New Paris, IN 46553-0120 USA

[www.wmpress.org](http://www.wmpress.org)

12-24



Read booklets online or by App

[www.wmp-readonline.org](http://www.wmp-readonline.org)

313/2 Tzotzil HFA